

四庫全書薈要

• 乾隆御覽本

史部

欽定四庫全書薈要

史部

魏書卷十九上

中

詳校官內閣侍讀臣孫球



欽定四庫全書薈要卷四千四百三十五

史部

魏書卷十九上

齊

魏

收

撰

列傳第七上

景穆十二王

陽平王 京兆王 濟陰王 汝陰王 樂浪王

廣平王

景穆皇帝十四男恭皇后生文成皇帝袁淑房生陽平

幽王新成尉椒房生京兆康王子推濟陰王小新成陽
椒房生汝陰靈王天賜樂浪厲王萬壽廣平殤王洛侯
母並闕孟椒房生任城康王雲劉椒房生南安惠王楨
城陽康王長壽慕容椒房生章武敬王太洛尉椒房生
樂陵康王胡兒孟椒房生安定靖王休趙王深早薨無
傳母闕魏舊太子後庭未有位號高宗即位恭宗宮人
有子者並號為椒房

陽平王新成太安三年封拜征西大將軍後為內都大

官薨謚曰幽

長子安壽襲爵高祖賜名頤累遷懷朔鎮大將都督三道諸軍事北討詔徵赴京勗以戰伐之事對曰當仰仗廟算使呼韓同渭橋之禮帝歎曰壯哉王言朕所望也未發遭母憂詔遣侍臣以金革敦喻既殯而發與陸叡集三道諸將議軍途所詣於是中道出黑山東道趨土盧河西道向侯延河軍過大磧大破蠕蠕頤入朝詔曰王之前言果不虛也後除朔州刺史及恒州刺史穆泰

謀反遣使推頤為主頤密以狀聞泰等伏誅帝甚嘉之
世宗景明元年薨于青州刺史謚曰莊王傳國至孫宗
肩肅宗時坐殺叔父賜死爵除

頤弟衍字安樂賜爵廣陵侯位梁州刺史表請假王以
宗威重詔曰可謂無厭求也所請不合轉徐州刺史至
州病重帝勅徐成伯乘傳療疾差成伯還帝曰卿定名
醫賚絹三千匹成伯辭請受一千帝曰詩云人之云亡
邦國殄瘁以是而言豈惟三千匹乎其為帝所重如此

後所生母雷氏卒表請解州詔曰先君餘尊之所厭禮
之明文季末陵遲斯典或廢侯既親王之子宜從餘尊
之義便可大功後卒於雍州刺史謚曰康侯衍性清慎
所在廉潔又不營產業歷牧四州皆有稱績亾日無斂
屍具子暢

暢弟融字叔融貌甚短陋驍武過人莊帝謀殺爾朱榮
以融為直閣將軍及爾朱兆入洛融逃人間

衍弟欽字思若位中書監尚書右僕射儀同三司欽色

尤黑故時人號為黑面僕射欽淫從兄麗妻崔氏為御史中尉封回劾奏遇赦免尋除司州牧欽少好學早有令譽時人語曰皇宗畧畧壽安思若及晚年貴重不能有所匡益識者輕之欽曾託青州人高僧壽為子求師師至未幾逃去欽以讓僧壽僧壽性滑稽反謂欽曰凡人絕粒七日乃死始經五朝便爾逃遁去食就信實有所闕欽乃大慙於是待客稍厚後除司空公封鉅平縣公於河陰遇害贈假黃鉞太師太尉公

子子孝字季業早有令譽年八歲司徒崔光見而異之
曰後生領袖必此人也

京兆王子推太安五年封位侍中征南大將軍長安鎮
都大將子推性沉雅善於綏接秦雍之人服其威惠入
為中都大官察獄有稱顯祖將禪位於子推以大臣固
諫乃傳高祖高祖即位拜侍中本將軍開府儀同三司
青州刺史未至道薨

子太興襲拜長安鎮都大將以黷貨削除官爵後除祕

書監還復前爵拜統萬鎮將改封西河後改鎮為夏州
仍以太興為刺史除守衛尉卿初太興遇患請諸沙門
行道所有資財一時布施乞求病愈名曰散生齋及齋
後僧皆四散有一沙門方云乞齋餘食太興戲之曰齋
食既盡唯有酒肉沙門曰亦能食之因出酒一斗羊脚
一隻食盡猶言不飽及辭出後酒肉俱在出門追之無
所見太興遂佛前乞願向者之師當非俗人若此病得
差即捨王爵入道未幾便愈遂請為沙門表十餘上乃

見許時高祖南討在軍詔皇太子於四月八日為之下
髮施帛二千匹既為沙門更名僧懿居嵩山太和二十
二年終

子昂字伯暉襲薨

子綜字魏慶襲孝靜時累遷太尉錄尚書事司州牧青
州刺史薨于州贈假黃鉞太傅司徒公謚曰文綜寬和
有度量美容貌風望儼然得喪之間不見于色性清儉
不營產業身死之日家無餘財

昂弟仲景性嚴峭莊帝時兼御史中尉京師肅然每向
臺恒駕赤牛時人號赤牛中尉太昌初為河南尹奉法
無私時吏部尚書樊子鵠部下縱橫又為盜竊仲景密
加收捕悉獲之咸即行決于是豪貴寒心出帝將西行
授仲景中軍大都督留京師齊獻武王欲至洛陽仲景
遂棄妻子而遁

仲景弟暹字叔照莊帝初除南兗州刺史在州猛暴多
所殺害元顥入洛暹據州不屈莊帝還宮封汝陽王遷

秦州刺史先時秦州城人屢為反覆遲盡誅之存者十
一二普泰元年除涼州刺史貪暴無極欲規府人及商
胡富人財物詐一臺符誑諸豪等云欲加賞一時屠戮
所有資財生口悉沒自入孝靜時位侍中錄尚書事薨
贈太師錄尚書

子沖襲無子國絕

太興弟遙字太原有器望以左衛將軍從高祖南征賜
爵饒陽男世宗初遭所生母憂表請解任詔以餘尊所

厭不許肅宗初累遷左光祿大夫仍領護軍遷冀州刺史遙以諸胡先無籍貫姦良莫辨悉令造籍又以諸胡設籍當欲稅之以充軍用胡人不願乃共構遙云取納金馬御史按驗事與胡同遙坐除名遙陳枉不已勅有司重究乃披雪遷右光祿大夫時冀州沙門法慶既為妖幻遂說渤海人李歸伯歸伯合家從之招率鄉人推法慶為主法慶以歸伯為十住菩薩平魔軍司定漢王自號大乘殺一人者為一住菩薩殺十人為十住菩薩

又合狂藥令人服之父子兄弟不相知識唯以殺害為

事於是聚衆殺阜城令破渤海郡殺害吏人刺史蕭寶

寅遣兼長史崔伯麟討之敗於煮棗城伯麟戰沒凶衆

遂盛所在屠滅寺舍斬戮僧尼焚燒經像云新佛出世

除去舊魔詔以遙為使持節都督北征諸軍事帥步騎

十萬以討之法慶相率攻遙遙並擊破之遙遣輔國將

軍張蚪等率騎追掩討破擒法慶并其妻尼惠暉等斬

之傳首京師後擒歸伯鸞于都市初遙大功昆弟皆是

恭宗之孫至肅宗而本服絕故除遙等屬籍遙表曰竊聞聖人所以南面而聽天下其不可得變革者則親也尊也四世而總服窮五世而袒免六世而親屬竭矣去茲以往猶繫之以姓而弗別綴之以食而弗殊又律云議親者非唯當世之屬親歷謂先帝之五世謹尋斯旨將以廣帝宗重磐石先皇所以變茲事條為此別制者太和之季方有意于吳蜀經始之費慮深在初割減之起斲出當時也且臨淮王提分屬籍之始高祖賜帛三

千匹所以重分離樂浪王長命亦賜縑二千匹所以存
慈睦此皆先朝殷勤克念不得已而然者也古人有言
百足之蟲至死不僵者以其輔已者衆臣誠不欲妄親
太階苟求潤屋但傷大宗一分則天子屬籍不過十數
人而已在漢諸王之子不限多少皆列土而封謂之曰
侯至于魏晉莫不廣胙河山稱之曰公者蓋惡其大宗
之不固骨肉之恩疎矣臣去皇上雖是五世之遠於先
帝便是天子之孫高祖所以國秩祿賦復給衣食后族

唯給其賦不與衣食者欲以別外內限異同也今諸廟之感在心未忘行道之悲儻然已及其諸封者身亡之日三年服終然後改奪今朝廷猶在過密之中便議此事實用未安詔付尚書博議以聞尚書令任城王澄尚書左僕射元暉奏同遙表靈太后不從卒謚曰宣公遙弟恒字景安粗涉書史恒以春秋之義為名不以山川表求改名芝歷位太常卿中書監侍中後於河陰遇害贈太傅司徒公謚曰宣穆公

濟陰王小新成和平二年封頗有武畧庫莫奚侵擾詔
新成率衆討之新成乃多為毒酒賊既漸逼便棄營而
去賊至喜而競飲聊無所備遂簡輕騎因醉縱擊俘馘
甚多後位外都大官薨贈大將軍謚曰惠公

子鬱字伏生襲位開府為徐州刺史以黷貨賜死國除
長子弼字邕明剛正有文學位中散大夫以世嫡應襲
先爵為季父尚書僕射麗因于氏親寵遂奪弼王爵橫
授同母兄子誕於是弼絕棄人事託疾還私第世宗徵

為侍中弼上表固讓入嵩山以穴為室布衣蔬食卒建義元年子暉業訴復王爵永安三年追贈尚書令司徒公謚曰文獻初弼嘗夢人謂之曰君身不得傳世封其紹先爵者君長子紹遠也弼覺即語暉業終如其言

暉業少險薄多與寇盜交通長乃變節涉子史亦頗屬文而慷慨有志節歷位司空太尉加特進領中書監錄尚書事齊文襄嘗問之曰比何所披覽對曰數尋伊霍之傳不讀曹馬之書暉業以時運漸謝不復圖全唯事

飲啗一日三羊三日一犢又嘗賦詩云昔居王道泰濟
濟富羣英今逢世路阻狐兔鬱縱橫齊初降封美陽縣
公開府儀同三司特進暉業之在晉陽也無所交通居
常閑暇乃撰魏藩王家世號為辨宗錄四十卷行于世
暉業弟昭業頗有學尚位諫議大夫莊帝將幸洛南昭
業立於閭闔門外扣馬諫帝避之而過後勞勉之位給
事黃門侍郎衛將軍右光祿大夫卒謚曰文侯
鬱弟偃字仲璇位太中大夫卒

子誕字曇首初誕伯父鬱以貪汙賜死爵除景明三年
誕訴云伯鬱前朝之封正以年長襲封以罪除爵爵由
謬襲襲應歸正詔以偃正元妃息曇首濟陰王嫡孫可
聽紹封以纂先緒誕既襲爵除齊州刺史在州貪暴大
為人患牛馬騾驢無不逼奪家之奴隸悉迫取良人為
婦有沙門為誕採藥還而見之誕曰師從外來有何消
息對曰唯聞王貪願王早代誕曰齊州七萬戶吾至來
一家未得三十錢何得言貪後為御史中尉元纂所糾

會赦免薨謚曰靜王

子撫字伯懿襲莊帝初為從兄暉業訴奪王爵

偃弟麗字寶掌位兼宗正卿右衛將軍遷光祿勳宗正
右衛如故時秦州屠各王法智推州主簿呂苟兒為主
號建明元年置立百官攻逼州郡涇州人陳瞻亦聚衆
自稱王號聖明元年詔以麗為使持節都督秦州刺史
與別駕楊椿討之苟兒率衆十餘萬屯孤山列據諸險
圍逼州城麗出擊大破之便進軍永洛賊徒逆戰麗夜

擊走之行秦州事李韶破苟兒于孤山乘勝追奔三十里獲其父母妻子斬賊王五人其餘相繼歸降諸城之圍亦悉奔散苟兒率其王公三十餘人詣麗請罪椿又斬瞻麗因平賊之勢枉掠良善七百餘人世宗嘉其功詔有司不聽追檢拜雍州刺史為政嚴酷吏人患之其妻崔氏誕一男麗遂出州獄囚死及徒流案未申臺者一時放免遷冀州刺史入為尚書左僕射帝問曰聞公在州殺戮無理枉濫非一又大殺道人對曰臣在冀州

可殺道人二百許人亦復何多帝曰一物不得其所若
納諸隍況殺道人二百而言不多麗脫冠謝賜坐卒謚
曰威

子顯和少有節操歷司徒記室參軍司徒崔光每見之
曰元參軍風流清秀容止閑雅乃宰相之器除徐州安
東府長史刺史元法僧叛顯和與戰被擒執手命與連
坐顯和曰顯和與阿翁同源別派皆是磐石之宗一朝
以地外叛若遇董狐能無慙德遂不肯坐法僧猶欲慰

喻顯和曰乃可死作惡鬼不能生為叛臣及將殺之神色自若建義初贈秦州刺史

汝陰王天賜和平三年封拜鎮南大將軍虎牢鎮都大將後為內都大官高祖初殿中尚書胡莫寒簡西部勅勒豪富兼丁者為殿中武士而大納財貨簡選不平衆怒殺莫寒及高平假鎮將奚陵于是諸部勅勒悉叛詔天賜與給事中羅雲督諸軍討之前鋒勅勒詐降雲信之副將元伏曰勅勒色動恐將有變今不設備將為所

圖雲不從勅勒輕騎數千襲殺雲天賜僅得自全後除
征北大將軍護匈奴中郎將累遷懷朔鎮大將坐貪殘
恕死削除官爵卒高祖哭於思政觀贈本爵葬從王禮
謚曰靈王

子逞字萬安卒於齊州刺史謚曰威

逞子慶和東豫州刺史為蕭衍將所攻舉城降之衍以
為北道總督魏王至項城朝廷出師討之望風退走衍
責之曰言同百舌膽若鼷鼠遂徙合浦

逞弟汎字普安自元士稍遷營州刺史性貪殘人不堪
命相率逐之汎走平州後除光祿大夫宗正卿封東燕
縣男於河陰遇害

天賜第五子脩義字壽安涉獵書傳頗有文才為高祖
所知自元士稍遷左將軍齊州刺史脩義以齊州頻喪
刺史累表固辭詔曰脩短有命吉凶由人何得過致憂
憚以乖維城之寄違凶就吉時亦有之可聽更立館宇
於是移理東城脩義為政寬和愛人在州四歲不殺一

人百姓以是追思之遷秦州刺史肅宗初表陳庶人禧
庶人愉等請宥前愆賜葬陵域靈太后詔曰收葬之恩
事由上旨藩岳何得越職干陳在州多受納累遷吏部
尚書及在銓衡唯事貨賄授官大小皆有定價時中散
大夫高居者有旨先敘時上黨郡缺居遂求之脩義私
已許人抑居不與居大言不遜脩義命左右牽曳之居
對大衆呼天唱賊人問居曰白日公庭安得有賊居指
脩義曰此座上者違天子明詔物多者得官京師白劫

此非大賊乎脩義失色居行罵而出後欲邀車駕論脩義罪狀左僕射蕭寶夤諭之乃止二秦反假脩義兼尚書右僕射西道行臺行秦州事為諸軍節度脩義性好酒每飲連日遂遇風病神明昏喪雖至長安竟無部分之益元志敗沒賊東至黑水更遣蕭寶夤討之以脩義為雍州刺史卒於州贈司空謚曰文子均位給事黃門侍郎

樂浪王萬壽和平三年封拜征東大將軍鎮和龍性貪

暴徵還道憂薨謚曰厲王

子康王樂平襲薨

子長命襲坐殺人賜死國除

子忠肅宗時復前爵位太常少卿出帝汎舟天淵池命
宗室諸王陪宴忠愚而無智性好衣服遂著紅羅襦繡
作領碧紬袴錦為緣帝謂曰朝廷衣冠應有常式何為
著百戲衣忠曰臣少來所愛情存綺羅歌衣舞服是臣
所願帝曰人之無良乃至此乎

廣平王洛侯和平二年封薨謚曰殤無子後以陽平幽王第五子匡後之

匡字建扶性耿介有氣節高宗薨之謂曰叔父必能儀刑社稷匡輔朕躬今可改名為匡以成克終之美世宗即位累遷給事黃門侍郎茹皓始有寵百寮微憚之世宗曾于山陵還詔匡陪乘又命皓登車皓褰裳將上匡諫止世宗推之令下皓恨匡失色當時壯其忠蹇世宗親政除肆州刺史匡既忤皓懼為所害廉慎自修甚有

聲績遷恒州刺史徵為大宗正卿河南邑中正匡奏親
王及始藩二藩王妻悉有妃號而三藩已下皆謂之妻
上不得同為妃名而下不及五品已上有命婦之號竊
為疑詔曰夫貴於朝妻榮于室婦女無定升從其夫三
藩既啟王封妃名亦宜同等妻者齊也理與已齊可從
妃例自是三藩王妻名號始定後除度支尚書匡表引
樂陵章武之例求紹洛侯封詔付尚書議尚書奏聽襲
封以明興絕之義匡與尚書令高肇不平常無降下之

色時世宗委政於肇朝廷傾憚唯匡與肇抗衡先自造棺置于廳事意欲輿棺詣闕論肇罪惡自殺切諫肇聞而惡之後因與太常劉芳議爭權量遂與肇聲色御史中尉王顯奏匡曰自金行失御羣僞競興禮壞樂崩彝倫攸斁大魏應期奄有四海高祖孝文皇帝以睿聖統天克復舊典乃命故中書監高閭廣旌儒林推尋樂府依据六經參諸國志以忝裁寸將均周漢舊章屬雲構中遷尚未云就高祖睿思玄深參考經記以一忝之大

用成分體準之為尺宣布施行暨正始中故太樂令公
孫崇輒自立意以泰十二為寸別造尺度定律刊鍾皆
向成訖表求觀試時敕太常卿臣芳以崇造既成請集
朝英議其得否芳疑崇尺度與先朝不同察其作者于
經史復異推造鮮據非所宜行時尚書令臣肇清河王
懌等以崇造乖謬與周禮不同遂奏臣芳依周禮更造
成訖量校從其善者而芳以先朝尺度事合古典乃依
前詔書以泰刊寸並呈朝廷用裁金石于時議者多云

芳是唯黃門侍郎臣孫惠蔚與崇扶同二途參差頻經
考議而尚書令臣肇以芳造崇物故之後而惠蔚亦造
一尺仍云扶以比崇尺自相乖背量省二三謂芳為得
而尚書臣匡表云劉孫二尺長短相傾稽考兩律所容
殊異言取中忝校彼二家云並參差抑中無所自立一
途請求議判當時議者或是於匡兩途舛駁未即時定
肇又云權斛斗尺班行已久今者所論豈喻先旨宜仰
依先朝故尺為定自爾以後而匡與肇厲言都座聲色

相加高下失其常倫噶競無復彝序匡更表列據已十
是云芳十非又云肇前被敕旨共芳營督規立鍾石之
名希播製作之譽乃憑樞衡之尊藉舅氏之勢與奪任
心臧否自己阿黨劉芳遏絕臣事望勢雷同者接以恩
言依經按古者即被怒責雖未指鹿化馬移天徙日實
使蘊藉之士聳氣坐端懷道之夫結舌筵次又言芳昔
與崇競恒言自作今共臣論忽稱先朝豈不前謂可行
輒欲自取後知錯謬便推先朝殊非大臣之體深失為

下之義復考校勢臣之前量度偏頗之手臣必朋足內
朝抱璞人外囂言肆意彰于朝野然匡職當出納獻替
所在斗尺權度正是所司若已有所見能練臧否宜應
首唱義端早辨諸惑何故嘿心隨從不關一言見芳成
事方有此語計芳才學與匡殊懸所見淺深不應相匹
今乃始發恐此由心借智於人規成虛譽況匡表云所
據銅權形如古誌明是漢作非莽別造及案權銘云黃
帝始祖德布於虞虞帝始祖德布於新若莽佐漢時事

寧有銘偽新之號哉又尋莽傳云莽居攝即變漢制度
考校二證非漢權明矣復云芳之所造又短先朝之尺
臣既比之權然相合更云芳尺與千金堰不同臣復量
比因見其異二三浮濫難可據準又云共構虛端妄為
疑似託以先朝云非已製臣按此欺詐乃在於匡不在
於芳何以言之芳先被勅專造鍾律管簫優劣是其所
裁權斛尺度本非其事比前門下索芳尺度而芳牒報
云依先朝所班新尺復應下黍更不增損為造鍾律調

正分寸而已檢匡造時在牒後一歲芳於爾日匡未共
爭已有此牒豈為詐也計崇造寸積黍十二羣情共知
而芳造寸唯止十黍亦俱先朝詔書以黍成寸首尾歷
然寧有輒欲自取之理肇任居端右百寮是望言行動
靜必副具瞻若恃權阿黨詐託先詔將指鹿化馬徙日
移天即是魏之趙高何以宰物肇若無此匡既誣毀宰
相訛謗明時豈應談議之間便有指鹿之事可否之際
輕生則足之言趙高矯惑事屬衰秦卞和抱璞時遇暴

楚何宜以濟濟之朝而有斯謗者哉阻惑朝聽不敬至甚請以肇匡並禁尚書推窮其原付廷尉定罪詔曰可有司奏匡誣肇處匡死刑世宗恕死降為光祿大夫又兼宗正卿出為兗州刺史匡臨發帝引見于東堂勞勉之匡猶以尺度金石之事國之大經前雖為南臺所彈然猶許更議若議之日願聽臣暫赴世宗曰劉芳學高一時深明典故其所據者與先朝尺乃寸過一黍何得復云先朝之意也兗州既所執不經後議之日何待赴

都也肅宗初入為御史中尉匡嚴于彈糾始奏于忠次
彈高聰等免官靈太后並不許以違其糾惡之心又慮
匡辭解欲獎安之進號安南將軍後加鎮東將軍匡屢
請更權衡不已於是詔曰謹權審度自昔令典定章革
歷往代良規匡宗室賢亮留心既久可令更集儒貴以
時驗決必務權衡得衷令寸齋不舛又詔曰故廣平殤
王洛侯體自恭宗茂年薨殞國除祀廢不祀忽諸匡親
同若子私繼歲久宜樹維城永茲磐石可特襲王爵封

東平郡王匡所制尺度訖請集朝士議定是非詔付門下尚書三府九列議定以聞太師高陽王雍等議曰伏惟高祖創改權量已定匡今新造微有參差且匡云所造尺度與漢志王莽權斛不殊又晉中書監荀勗云後漢至魏尺長于古四分有餘于是依周禮積黍以起度量惟古玉律及鍾遂改正之尋勗所造之尺與高祖所定毫釐畧同又侍中崔光得古象尺于時亦準議令施用仰惟孝文皇帝德邁前王睿明下燭不刊之式事難

變改臣等參論請停匡議永遵先皇之制詔從之匡每有奏請尚書令任城王澄時致執奪匡剛隘內遂不平先所造棺猶在僧寺乃復修事將與澄相攻澄頗知之後將赴省與匡逢遇驕卒相撾朝野駭愕澄因是奏匡罪狀三十餘條廷尉處以死刑詔付八座議特加原宥削爵除官三公郎中辛雄奏理之後特除平州刺史徙青州刺史尋為關右都督兼尚書行臺遇疾還京孝昌初卒謚曰文貞後追復本爵改封濟南王

第四子獻襲齊受禪爵例降

魏書卷十九上

魏書卷十九上考證

景穆十二王列傳上○魏收書闕後人所補

樂浪王萬壽傳○浪目錄作良

魏書卷十九上考證

欽定四庫全書薈要卷四千四百三十六

史部

魏書卷十九中

齊

魏

收

撰

列傳第七中

景穆十二王

任城王

任城王雲年五歲恭宗崩號哭不絕聲世祖聞之而呼
抱之泣曰汝何知而有成人之意也和平五年封拜使

持節侍中征東大將軍和龍鎮都大將顯祖時拜都督
中外諸軍事中都坐大官聽理民訟甚收時譽延興中
顯祖集羣寮欲禪位于京兆王子推王公卿士莫敢先
言雲進曰陛下方隆太平臨覆四海豈得上違宗廟下
棄兆民父子相傳其來久矣皇魏之興未之有革皇儲
正統聖德夙章陛下必欲割捐塵務願神清曠者冢副
之寄宜紹寶厯若欲捨儲輕移宸極恐非先聖之意駭
動人情又天下是祖宗之天下而陛下輒改神器上乖

七廟之靈下長姦亂之道此是禍福所由願深思慎之
太尉源賀又進曰陛下今欲外選諸王而禪位于皇叔
者臣恐春秋蒸嘗昭穆有亂脫萬世之後必有逆饗之
譏深願思任城之言東陽公元丕等進曰皇太子雖聖
德夙彰然實冲幼陛下富于春秋始覽機政普天景仰
率土僉心欲隆獨善不以萬物為意其若宗廟何其若
億兆何顯祖曰儲宮正統受終文祖羣公相之有何不
可于是傳位于高祖後蠕蠕犯塞雲為中軍大都督從

顯祖討之遇于大磧事具蠕蠕傳後仇池氏反以雲為
征西大將軍討平之除都督徐兗二州緣淮諸軍事征
東大將軍開府徐州刺史雲以太妃蓋氏薨表求解任
顯祖不許雲悲號動疾乃許之性善撫綏得徐方之心
為百姓所追戀送遺錢貨一無所受顯祖聞而嘉之復
拜侍中中都大官賜帛千匹羊千口出為冀州刺史仍
本將軍雲留心政事甚得下情于是合州請戶輸絹五
尺粟五升以報雲恩高祖嘉之遷使持節都督陝西諸

軍事征南大將軍長安鎮都大將雍州刺史雲廉謹自
修留心庶獄挫抑豪彊羣盜息止州民頌之者千有餘
人文明太后嘉之賜帛千匹太和五年薨于州遺令薄
葬勿受贈襚諸子奉遵其旨喪至京師車駕親臨哭之
哀慟贈以本官謚曰康陪葬雲中之金陵

雲長子澄字道鎮少而好學及康王薨澄居喪以孝聞
襲封加征北大將軍高祖時蠕蠕犯塞加澄使持節都
督北討諸軍事以討之蠕蠕遁走又以氐羌反叛除都

督梁益荆三州諸軍事征南大將軍梁州刺史文明太
后引見澄誠厲之顧謂中書令李沖曰此兒風神吐發
德音閑婉當為宗室領袖是行使之必稱我意卿但記
之我不妄談人物也梁州氏帥楊仲顯婆羅楊卜兄弟
及符叱盤等自以居邊地險世為凶狡澄至州量彼風
俗誘導懷附表送婆羅授仲顯循城鎮副將楊卜廣業
太守叱槃固道鎮副將自餘首帥各隨才而用之款附
者賞違命加誅于是仇池帖然西南款順加侍中賜衣

一襲乘馬一匹以旌其能後轉征東大將軍開府徐州
刺史甚有聲績朝于京師引見于皇信堂高祖詔澄曰
昔鄭子產鑄刑書而晉叔向非之此二人皆是賢士得
失竟誰對曰鄭國寡弱攝于強鄰民情去就非刑莫制
故鑄刑書以示威雖乖古式合今權道隨時濟世子產
為得而叔向譏議示不忘古可與論道未可語權高祖
曰任城當欲為魏之子產也澄曰子產道合當時聲流
竹素臣既庸近何敢庶幾今陛下以四海為家宣文德

以懷天下但江外尚阻車書未一季世之民易以威伏
難以禮治愚謂子產之法猶應暫用大同之後便以道
化之高祖心方革變深善其對笑曰非任城無以識變
化之體朕方初改朝制當與任城共萬世之功耳後徵
為中書令改授尚書令蕭贍使庾革來朝革見澄音韻
道雅風儀秀逸謂主客郎張彝曰往魏任城以武著稱
今魏任城乃以文見美也時詔延四廟之子下逮玄孫
之胄申宗宴于皇信堂不以爵秩為列悉序昭穆為次

用家人之禮高祖曰行禮已畢欲令宗室各言其志可
率賦詩特令澄為七言連韻與高祖往復賭賽遂至極
懽際夜乃罷後高祖外示南討意在謀遷齋於明堂左
介詔太常卿王謨親令龜卜易筮南伐之事其兆遇革
高祖曰此是湯武革命順天應人之卦也羣臣莫敢言
澄進曰易言革者更也將欲應天順人革君臣之命湯
武得之為吉陛下帝有天下重光累葉今曰卜征乃可
伐叛不得云革命此非君人之卦未可全為吉也高祖

厲聲曰象云大人虎變何言不吉也澄曰陛下龍興既久豈可方同虎變高祖勃然作色曰社稷我社稷任城而欲沮衆也澄曰社稷誠知陛下之社稷然臣是社稷之臣子豫參顧問敢盡愚衷高祖既銳意必行惡澄此對久之乃解曰各言其志亦復何傷車駕還宮便召澄未及昇階遙謂曰向者之革卦今更欲論之明堂之忿懼衆人競言阻我大計故厲色怖文武耳想解朕意也乃獨謂澄曰今日之行誠知不易但國家興自北土徙

居平城雖富有四海文軌未一此間用武之地非可文
治移風易俗信為甚難峭函帝宅河洛王里因茲大舉
光宅中原任城意以為何如澄曰伊洛中區均天下所
據陛下制御華夏輯平九服蒼生聞此應當大慶高祖
曰北人戀本忽聞將移不能不驚擾也澄曰此既非常
之事當非常人所知唯須決之聖懷此輩亦何能為也
高祖曰任城便是我之子房加撫軍大將軍太子少保
又兼尚書左僕射及駕幸洛陽定遷都之策高祖詔曰

遷移之旨必須訪衆當遣任城馳驛向代問彼百司論
擇可否近日論革今真所謂革也王其勉之既至代都
衆聞遷詔莫不驚駭澄援引今古徐以曉之衆乃開伏
澄遂南馳還報會車駕於滑臺高祖大悅曰若非任城
朕事業不得就也從幸鄴宮除吏部尚書及幸代車駕
北巡留澄銓簡舊臣初魏自公侯以下迄於選臣動有
萬數冗散無事澄品為三等量其優劣盡其能否之用
咸無怨者駕還洛京復兼右僕射高祖至北邨遂幸洪

池命澄侍昇龍舟因賦詩以序懷高祖曰朕昨夜夢一
老公頭鬢皓白正理冠服拜立路左朕怪而問之自云
晉侍中嵇紹故此奉迎神爽卑懼似有求焉澄對曰晉
世之亂嵇紹以身衛主殞命御側亦是晉之忠臣比干
遭紂兇虐忠諫剖心可謂殷之良士二人俱死于王事
墳塋竝在于道周然陛下徙御殷洛經瀍墟而弔比干
至洛陽而遺嵇紹當是希恩而感夢高祖曰朕何德能
幽感達士也然實思追禮先賢標揚忠懿比干嵇紹皆

是古之誠烈而朕務濃于比干禮略于嵇紹情有愧然
既有此夢或如任城所言于是求其兆域遣使弔祭焉
蕭鸞既殺蕭昭業而自立昭業雍州刺史曹虎請以襄
陽內附分遣諸將車駕將自赴之豫州又表虎奉誠之
使不復重來高祖引澄及咸陽王禧彭城王勰司徒馮
誕司空穆亮鎮南李沖等議之高祖曰比得邊州表云
襄陽慕化朕將鳴鑾江沔為彼聲勢今復表稱更無後
信于行留之計竟欲如何禧等或云宜行或言宜止高

祖曰衆人紛紜意見不等朕莫知所從必欲盡行留之
勢使言理俱暢者宜有客主共相起發任城與鎮南為
應留之議朕當為宜行之論諸公俱坐聽得失長者從
之於是高祖曰二賢試言留計也沖對曰臣等正以徒
御草創人斯樂安內而應者未審不宜輕爾動發高祖
曰襄陽款問似當是虛亦知初遷之民無宜勞役脫歸
誠有實即當乘其悅附遠則有會稽之會近則略平江
北如其送款是虛且可遊巡淮楚問民之瘼使彼土蒼

生知君德之所在復何所損而惜此一舉脫降問是實而停不撫接不亦稽阻款誠毀朕大略也澄曰降問若審應有表質而使人一返靜無音問其詐也可見今代遷之衆人懷戀本細累相攜始就洛邑居無一椽之室家闕儋石之糧而使怨苦即戎泣當白刃恐非歌舞之師也今茲區宇初構又東作方興正是子來百堵之日農夫肆力之秋宜寬彼逋誅惠此民庶且三軍已援無稽赴接苟其款實力足納撫待剋平襄沔然後動駕今

無故勞涉空為往返恐挫損天威更成賊膽願上覽盤
庚始遷之艱難下矜詩人由庚之至詠輯寧新邑惠康
億兆而司空亮以為宜行公卿皆同之澄謂亮曰公在
外見旌鉞既張而有憂色每聞談論不願此行何得對
聖顏更如斯之語也面背不同事涉欺佞非所謂論道
之德更失國士之體或有傾側當由公輩佞臣李沖曰
任城王可謂忠於社稷願陛下深察其言臣等在外皆
憚征行唯貴與賤不謀同辭仰願聖心裁其可否高祖

曰任城適以公等從朕有如此論不從朕者何必皆忠而通識安危也小忠是大忠之賊無乃似諸澄曰臣既愚闇不識大理所可言者雖涉小忠要是竭盡微款不知大忠者竟何據高祖曰任城脫居台鼎之任欲令大忠在己也澄曰臣誠才非台弼智闕和鼎脫得濫居公鉉庶當官而行不負愚志高祖大笑澄又謂亮曰昔汲黯於漢武前面折公孫食脫粟飯臥布被云其詐也于時公孫謙讓下之武帝歎及黯至忠公孫長者二人稱

賢公既道均昔士願思長者之言高祖笑曰任城欲自
比汲黯也且所言是公未知得失所在何便謝司空也
駕遂南伐五等開建食邑一千戶後從征至懸瓠以篤
疾還京駕餞之汝濱賦詩而別車駕還洛引見王公侍
臣於清徽堂高祖曰此堂成來未與王公行宴樂之禮
後東閣廡堂粗復始就故今與諸賢欲無高而不升無
小而不入因之流化渠高祖曰此曲水者亦有其義取
乾道曲成萬物無滯次之洗煩池高祖曰此池中亦有

嘉魚澄曰此所謂魚在在藻有頌其首高祖曰且取王
在靈沼於叔魚躍次之觀德殿高祖曰射以觀德故遂
命之次之凝閑堂高祖曰名目要有其義此蓋取夫子
閑居之義不可縱奢以忘儉自安以忘危故此堂後作
茅茨堂謂李沖曰此東曰步元廡西曰遊凱廡此堂雖
無唐堯之君卿等當無愧于元凱沖對曰臣既遭唐堯
之君不敢辭元凱之譽高祖曰光景垂落朕同宗則有
載考之義卿等將出無遠何得默爾不示德音即命黃

門侍郎崔光郭祚通直郎邢巒崔休等賦詩言志燭至
公卿辭退李冲再拜上千萬歲壽高祖曰卿向以燭至
致辭復獻千萬之壽朕報卿以南山之詩高祖曰燭至
辭退庶姓之禮在夜載考宗族之義卿等且還朕與諸
王宗室欲成此夜飲又從幸鄴還洛以出納之勞增邑
五百戶坐公事免官尋兼吏部尚書恒州刺史穆泰在
州謀反推朔州刺史陽平王頤為主頤表其狀高祖召
澄入見疑閑堂曰適得陽平表曰穆泰謀為不軌招誘

宗室脫或必然遷京甫爾北人戀舊南北紛擾朕洛陽不立也此事非任城不辦可為我力疾向北如其弱也直往擒剪若其勢彊可承制發并肆兵以殄之雖知王患既是國家大事不容辭也澄曰泰等愚惑正戀本為此非有遠圖臣誠怯弱不憚是輩雖復患懷豈敢有辭謹當罄盡心力繼之以死願陛下勿憂高祖笑曰得任城此行朕復何憂也遂授節銅虎竹使符御仗左右仍行恒州事行達鴈門太守夜告泰已握衆西就陽平城

下聚結唯見弓仗澄聞便速進時右丞孟斌曰事不可
量須依勅召并肆兵然後徐動澄曰泰既構逆應據堅
城而更迎陽平度其所為似當勢弱泰既不相拒無故
發兵非宜也但速往鎮之民心自定遂倍道兼行出其
不意又遣治書侍御史李煥先赴至即擒泰民情怡然
窮其黨與罪人皆得鉅鹿公陸叡安樂侯元隆等百餘
人皆獄禁具狀表聞高祖覽表大悅召集公卿以下以
表示之曰我任城可謂社稷臣也尋其罪案正復臯陶

斷獄豈能過之顧謂咸陽王等曰汝等脫當其處不能辦此車駕尋幸平城勞澄曰任城此行深副遠寄對曰陛下威靈遠被罪人無所逃刑臣何勞之有引見逆徒無一人稱枉時人莫不歎之高祖顧謂左右曰昔仲尼云聽訟吾猶人也必也使無訟乎然聖人之聽訟殆非常人所匹也無訟今日見之矣以澄正尚書車駕南伐留澄居守復兼右僕射澄表請以國秩一歲租布帛助供軍資詔受其半高祖幸鄴值高車樹者反叛車駕

將親討之澄表諫不宜親行會江陽王繼平之乃止高祖還洛引見公卿高祖曰營國之本禮教為先朕離京邑以來禮教為日新以不澄對曰臣謂日新高祖曰朕昨入城見車上婦人冠帽而著小襦襖者若為如此尚書何為不察澄曰著猶少于不著者高祖曰深可怪也任城意欲令全著乎一言可以喪邦者斯之謂歟可命史官書之又曰王者不降佐於蒼昊皆拔才而用之朕失於舉人任許一羣婦人輩奇事當更銓簡耳任城在

省為舉天下網維為當署事而已澄曰臣實署事而已
高祖曰如此便一令史足矣何待任城又曰我遣舍人
宣詔何為使小人聞之澄曰時雖有幹吏去榜亦遠高
祖曰遠則不聞聞則不遠既得聞詔理故可知于是留
守羣臣遂免冠謝罪尋除尚書右僕射蕭寶卷遣其太
尉陳顯達入寇漢陽是時高祖不豫引澄入見清徽堂
詔曰顯達侵亂沔陽不安朕不親行莫攘此賊朕疾患
淹年氣力懈敝如有非常委任城大事是段任城必須

從朕澄涕泣對曰臣謹當竭股肱之力以命上報遂從
駕南伐高祖崩澄受顧命世宗初有降人嚴叔懋告尚
書令王肅遣孔思達潛通寶卷圖為叛逆寶卷遣俞公
喜送勅于肅公喜還南肅與裴叔業馬為信澄信之乃
表肅將叛輒下禁止咸陽北海二王奏澄擅禁宰輔免
官歸第尋出為平西將軍梁州刺史辭以母老除安東
將軍相州刺史復固辭改授安西將軍雍州刺史尋徵
赴季秋講武除都督淮南諸軍事鎮南大將軍開府揚

州刺史下車封孫叔敖之墓毀蔣子文之廟頻表南伐
世宗不許又辭母老乞解州任寢而不報加散騎常侍
澄表曰臣參訓先朝藉規有日前言舊軌頗亦聞之又
昔在恒代親習皇宗熟祕序疑庭無關日臣每于侍坐
先帝未嘗不以書典在懷禮經為事周旋之則不輟于
時自鳳舉中京方隆禮教宗室之範每蒙委及四門之
選負荷銓量自先皇升遐未遑修述學宮虛荷四門之
名宗人有闕四時之業青衿之緒于茲將廢臣每惟其

事竊所傷懷伏惟聖略宏遠四方罕務宴安之辰于是
乎在何為太平之世而令子衿之歎興焉聖明之日而
使宗人之訓闕焉愚謂可勅有司修復皇宗之學開闢
四門之教使將落之族日就月將詔曰胄子崇業自古
盛典國均之訓無應久廢尚書更可量宜修立澄又表
母疾解州任不聽蕭衍將張顗之寇陷夷陵戍澄遣輔
國將軍成興步騎赴討大破之復夷陵顗之遁走又遣
長風戍主奇道顯攻蕭衍陰山戍破之斬其戍主龍驤

將軍都亭侯梅興祖仍引攻白橐戍又破之斬其寧朔
將軍關內侯吳道爽澄表曰蕭衍頻斷東關欲令巢湖
汎溢湖周回四百餘里東關合江之際廣不過數十步
若賊計得成大湖傾注者則淮南諸戍必同晉陽之事
矣又吳楚便水且灌且掠淮南之地將非國有壽陽去
江五百餘里衆庶惶惶竝懼水害脫乘民之願攻敵之
虛豫勒諸州纂集士馬首秋大集則南瀆可為飲馬之
津霍嶺必成徙倚之觀事貴應機經略須早縱混一不

可必果江西自是無虞若猶豫緩圖不加除討關塞既成襄陵方及平原民戍定為魚矣詔發冀定瀛相并濟六州二萬人馬一千五百匹令仲秋之中畢會淮南并壽陽先兵三萬委澄經畧先是朝議有南伐之意以蕭寶寅為東揚州刺史據東城陳伯之為江州刺史戍陽石以澄總督二鎮授之節度至是勒兵進討以東關水衝大峴險要東關縱水陽石合肥有急懸之切不圖大峴則歷陽有乘險之援淮陵陸道九山水路並宜經略

於是遣統軍傅豎眼王神念等進次大峴東關九山淮陵皆分部諸將倍道據之總勒大衆絡繹相接而神念剋其關要潁川二城斬衍軍主費尼而寧朔將軍韋惠龍驤將軍李伯由仍固大峴澄遣統軍党法宗傅豎眼等進軍剋之遂圍白塔牽城數日之間便即逃潰衍青溪戍望風散走衍徐州刺史司馬明素率衆三千欲援九山徐州長史潘伯隣規固淮陵寧朔將軍王燮負險焦城法宗進克焦城破淮陵擒明素斬伯隣其濟陰太

守王厚彊廬江太守裴邃即亦奔退詔澄曰將軍文德
內昭武功外暢奮揚大畧將蕩江吳長旌始舒賊徒懾
氣銳旅方馳東關席卷想江湖弭波在旦夕耳所送首
虜竝已聞之初澄出討之後衍將姜慶真襲據壽春外
郭齊王蕭寶夤擊走之長史韋績坐免官澄以在外無
坐遂攻鍾離又詔鍾離若食盡三月已前固有可尅如
至四月淮水泛長舟行無礙宜善量之前事捷也此實
將軍經畧勲有常焉如或以水盛難圖亦可為萬全之

計不宜昧利無成以貽後悔也蕭衍冠軍將軍張惠紹
遊擊將軍殷暹驍騎將軍趙景悅龍驤將軍張景仁等
率衆五千送糧鍾離澄遣統軍王足劉思祖等邀擊惠
紹等大破之獲惠紹殷暹景仁及其屯騎校尉史文淵
等軍主以上二十七人既而遇雨淮水暴長引歸壽春
還旣狼狽失兵四千餘人頻表解州世宗不許有司奏
軍還失路奪其開府又降三階時蕭衍有移求換張惠
紹澄表請不許詔付八座會議尚書令廣陽王嘉等奏

宜還之詔乃聽還後果復寇邊轉澄鎮北大將軍定州
刺史初民中每有橫調百姓煩苦前後牧守未能蠲除
澄多所省減民以忻賴又明黜陟賞罰之法表減公園
之地以給無業貧口禁造布絹不任衣者母孟太妃薨
居喪毀瘠當世稱之服闋除太子太保于時高肇當朝
猜忌賢戚澄為肇間構常恐不全乃終日昏飲以示荒
敗所作詭越時謂為狂世宗夜崩時事倉卒高肇擁兵
于外肅宗冲幼朝野不安澄疎斥不預機要而朝望所

屬領軍于忠侍中崔光等奏澄為尚書令于是衆心忻服又加散騎常侍驃騎大將軍尋遷司空加侍中俄詔領尚書令初正始之末詔百司普昇一級而執事者不達旨意刺史守令限而不及澄奏曰竊惟雲構鬱起澤及百司企春望榮內外同慶至于賞陟不及守宰爾來十年冤訟不絕封回自鎮遠安州入為太尉長史元匡自征虜恒州入作宗卿二人遷授竝在先詔應蒙之理備在于斯兼州佐停私之徒陪臣郡丞之例尚蒙天澤

下降榮及當時然參佐之來皆因府主今府主不霑佐
官獨預棄本賞末愚謂未允今計刺史守宰之官請準
封回悉同汎限上允初旨百司之章下覆訟者元元之
心詔曰自今已後內外之事嘗經先朝者不得重聞澄
奏曰臣聞堯懸諫諍之鼓舜置誹謗之木皆所以廣耳
目于芻蕘達四聰于天下伏惟太祖開基化隆自遠累
聖相承于今九帝重光疊照污隆必同與奪隨時道無
恒體思過如渴言重千金故稱無諱之朝邁蹤三五高

祖冲年纂歷文明協統變官易律未為違典及慈聖臨朝母儀寓縣爰發慈令垂心滯獄深枉者仰日月於九泉微屈者希曲照于盆下今乃格以先朝限以一例斯誠奉導之本心實乖元元之至望在于謙挹有乖舊典謹尋抱枉求直或經累朝毫釐之差正之宜速謬若干里駟馬弗追故禮有損益事有可否父有諍子君有諫臣琴瑟不調理宜改作是以防川之論小決則通鄉校之言擁則敗國矧伊陳屈而可抑以先朝且先朝屈者

非故屈之或有司愛憎或執事濁僻空文致法以誤視
聽如此寃塞彌在可哀僭之與濫寧失不經乞收今旨
還依前詔詔曰省奏深體毗贊之情三皇異軌五代殊
風一時之制何必詮改必謂虛文設旨理在可申者何
容不同來執可依往制澄表上皇誥宗制并訓詁各一
卷意欲皇太后覽之思勸戒之益又奏利國濟民所宜
振舉者十條一曰律度量衡公私不同所宜一之二曰
宜興學校以明黜陟之法三曰宜興減繼絕各舉所知

四曰五調之外一不煩民任民之力不過三日五曰臨民之官皆須黜陟以旌賞罰六曰逃亡代輸去來年久者若非伎作任聽即住七曰邊兵逃走或實陷沒皆須精檢三長及近親若實隱之徵其代輸不隱勿論八曰工商世業之戶復徵租調無以堪濟今請免之使專其業九曰三長禁姦不得隔越相領戶不滿者隨近并合十曰羽林虎賁邊方有事暫可赴戰常戍宜遣蕃兵代之靈太后下其奏百寮議之事有同否時四中郎將兵

數寡弱不足以襟帶京師澄奏宜以東中帶滎陽郡南
中帶魯陽郡西中帶恒農郡北中帶河內郡選二品三
品親賢兼稱者居之省非急之作配以彊兵如此則深
根固本彊幹弱枝之義也靈太后初將從之後議者不
同乃止澄又重奏曰固本宜彊防微在豫故雖有文事
不忘武功況今南蠻仍獷北妖頻結來事難圖勢同往
變脫暴勃忽起振動關畿四府羸卒何以防擬平康之
世可以寄安遺之久長恐非善策如臣愚見卽將領兵

兼總民職省官實祿于是乎在求還依前增兵益號將
位既重則念報亦深軍郡相依則表裏俱濟朝廷無四
顧之憂姦宄絕窺覷之望矣卒不納又以流人初至遠
鎮衣食無資多有死者奏并其妻子給糧一歲從之尋
以疾患求解任不許蕭衍于浮山斷淮為堰以灌壽春
乃除使持節大將軍大都督南討諸軍事勒衆十萬將
出彭宋尋淮堰自壞不行澄以北邊鎮將選舉彌輕恐
賊虜闖邊山陵危迫奏求重鎮將之選修警備之嚴詔

不從賊虜入寇至于舊都鎮將多非其人所在叛亂犯
逼山陵如澄所慮澄奏都城府寺猶未周悉今軍旅初
寧無宜發衆請取諸職人及司州郡縣犯十杖已上百
鞭已下收贖之物絹一匹輸博二百以漸修造詔從之
太傅清河王懌表奏其事遂寢不行澄又奏曰臣聞賞
必以道用防淫人之姦罰不濫及以戒良士之困刑者
例也每垂三宥秉律執請不得已而用之是故小大之
獄察之以情一人呼嗟或虧王道刑罰得失乃興廢之

所由也竊聞司州牧高陽王臣雍拷殺奉朝請韓元昭
前門下錄事姚敬賢雖因公事理實未盡何者太平之
世草不橫伐行葦之感事驗隆周若昭等狀彰死罪以
定應刑于都市與衆棄之如其疑似不分情理未究不
宜以三清九流之官杖下便死輕絕民命傷理敗法往
年州于大市鞭殺五人及檢賊狀全無寸尺今復酷害
一至于此朝野云云咸懷驚愕若殺生在下虐專于臣
人君之權安所復用自開古以來明明之世未聞斯比

也武王曰吾不以一人之命而易天下盖重民命也請

以見事付廷尉推究驗其為劫之状察其拷殺之理使

是非分明幽魂獲雪詔從之澄當官而行無所回避又

奏墾田授受之制八條甚有綱貫大便于時前來尚書

文簿諸曹須則出借時公車署以理冤事重奏請真案

澄執奏以尚書政本特宜遠慎故凡所奏事閣道通之

盖以祕要之切防其宣露寧有古制所重今反輕之內

猶設禁外更寬也宜繕寫事意以付公車詔從之西域

噉嚙波斯諸國各因公使並遺澄駿馬一匹澄請付太僕以充國閑詔曰王廉貞之德有過楚相可勅付廐以成君子大哉之美御史中尉東平王匡奏請取景明元年以來內外考簿吏部除書中兵勲案并諸殿最欲以案校竊階盜官之人靈太后許之澄表曰臣聞三季之弊由于煩刑火德之興在于三約是以老聃云法令滋彰盜賊多有又曰其政察察其民缺缺又曰天網恢恢疎而不漏是故欲求治本莫若省事清心昔漢文斷獄

四百幾致刑措省事所致也蕭曹為相載其清靜畫一之歌清心之本也今欲求之于本宜以省事為先使在位羣官纂蕭曹之心以毗聖化如此則上下相安遠近相信百司不怠事無愆失豈宜擾世教以深文烹小鮮以煩手哉臣竊惟景明之初暨永平之末內外羣官三經考課逮延昌之始方加黜陟五品以上引之朝堂親決聖目六品以下例由勅判自世宗晏駕大宥三行所以蕩除故意與物更始革世之事方相窮覈以臣愚見

謂為不可又尚書職分樞機出納昔魏明帝卒至尚書門陳矯亢辭帝慙而返夫以萬乘之重非所宜行猶屈一言慙而回駕羣官百司而可相亂乎故陳平不知錢穀之數丙吉不問僵道之死當時以為達治歷代用為美談但宜各守其職思不出位潔己以勵時靖恭以致節又尋御史之體風聞是司至于冒勳妄考皆有處別若一處有風謠即應攝其一簿研檢虛實若差舛不同偽情自露然後繩以典刑人孰不服豈有移一省之案

取天下之簿尋兩紀之事窮革世之尤如此求過誰堪
其罪斯實聖朝所宜重慎也靈太后納之乃止後遷司
徒公侍中尚書令如故澄又表曰伏惟世宗宣武皇帝
命將授旗隨陸啟顙運籌制勝淮漢自賓節用勞心志
清六合是故纘武修文仍世彌盛陛下當周康靖治之
時豈得宴安于玄默然取外之理要由內彊圖人之本
先在自備蕭衍雖虐使其民而窺覷不已若遇我虛疲
士民凋窘賊行年老志張思播虺毒此之弗圖恐受其

病伏惟陛下妙齡在位聖德方昇皇太后總御天機乾
乾夕惕若留意于負荷忿車書之未一進賢拔能重官
人之舉標賞忠清旌養人之器修干戈之用畜熊虎之
士愛時鄙財輕寶重穀七八年間陛下聖略方剛親王
德幹壯茂將相膺力未衰愚臣猶堪戎伍荷戈帶甲之
衆蓄銳于今燕弧冀馬之盛充牣在昔又賊衍惡積禍
盈勢不能久子弟閭閻悖釁逆已彰亂亡之兆灼然可見
兼弱有徵天與不遠大同之機宜須蓄備昔漢帝力疾

討滅英布高皇臥病親除顯達夫以萬乘之主豈忘宴
安實以侵名亂正計不得已今宜慕二帝之遠圖以肅
寧為大任然頃年以來東西難寇艱虞之興首尾連接
雖尋得翦除亦大損財力且饑饉之氓散亡莫保收入
之賦不增出用之費彌衆不愛力以悅民無豐資以待
敵此臣所以夙夜懷憂悚息不寧者也易曰何以守位
曰仁何以聚人曰財故曰財者非天不生非地不長非
時不成非人不聚生聚之由如此其難集人守位若此

之重興替之道焉可不慮又古者使民歲不過三日食壯者之糧任老者之智此雖太平之法難卒而因然妨民害財不亦宜戒今墉雉素修廐庫崇列雖府寺膠塾少有未周大抵省府粗得庇憇理務諸寺靈塔俱足致虔講道唯明堂辟雍國禮之大來冬司徒兵至請籌量減徹專力經營務令早就其廣濟數施之財酬商互市之弊凡所營造自非供御切須戎仗急要亦宜微減以務阜積庶府無橫損民有全力夫食土簋而媯德昭寢

卑室而禹功盛章臺麗而楚力衰阿宮壯而秦財竭存
亡之由灼然可覩願思前王一同之功畜力聚財以待
時會靈太后銳于繕興在京師則起永寧太上公等佛
寺功費不少外州各造五級佛圖又數為一切齋會施
物動至萬計百姓疲于土木之功金銀之價為之踊上
削奪百官事力費損庫藏兼曲賚左右日有數千澄故
有此表雖卒不從常優答禮之政無大小皆引參決澄
亦盡心匡輔事有不利于民者必于諫諍雖不見用殷

勤不已內外咸敬憚之神龜二年薨年五十三賻布一千二百匹錢六十萬蠟四百斤給東園溫明祕朝服一具衣一襲大鴻臚監護喪事詔百寮興喪贈假黃鉞使持節都督中外諸軍事太傅領太尉公加以殊禮備九錫依晉大司馬齊王攸故事謚曰文宣王澄之葬也凶飾甚盛靈太后親送郊外停輿悲哭哀動左右百官會赴千餘人莫不歔歔當時以為哀榮之極第四子彞襲

彞字子倫繼室馮氏所生頗有父風拜通直散騎常侍
及元義專權而彞恥于託附故不得顯職莊帝初河陰
遇害贈車騎將軍儀同三司青州刺史謚曰文

子度世襲武定中金紫光祿大夫齊受禪爵例降

彞兄順字子和九歲師事樂安陳豐初書王羲之小學
篇數千言晝夜誦之旬有五曰一皆通徹豐奇之白澄
曰豐十五從師迄于白首耳目所經未見此比江夏黃
童不得無雙也澄笑曰藍田生玉何容不爾十六通杜

氏春秋恒集門生討論同異于時四方無事國富民康
豪貴子弟率以朋遊為樂而順下帷讀書篤志愛古性
褻諤淡于榮利好飲酒解鼓琴每長吟永歎吒詠虛室
世宗時上魏頌文多不載起家為給事中時尚書令高
肇帝舅權重天下人士望塵拜伏順曾懷刺詣肇門門
者以其年少答云在坐大有貴客不肯為通順叱之曰
任城王兒可是賤也及見直往登牀捧手抗禮王公先
達莫不怪愕而順辭吐傲然若無所覩肇謂眾賓曰此

兒豪氣尚爾況其父乎及出輦加敬送之澄聞之大怒杖之數十後超轉中書侍郎俄遷太常少卿以父憂去職哭泣嘔血身自負土時年二十五便有白髮免喪抽去不復更生世人以為孝思所致尋除給事黃門侍郎時領軍元乂威勢尤盛凡有遷授莫不造門謝謁順拜表而已曾不詣乂乂謂順曰卿何謂聊不見我順正色曰天子富於春秋委政宗輔叔父宜以至公為心舉士報國如何賣恩責人私謝豈所望也至于朝論得失順

常鯁言正議曾不阿旨由此見憚出除平北將軍恒州
刺史順謂義曰北鎮紛紜方為國梗桑乾舊都根本所
繫請假都督為國捍屏義心疑難不欲授以兵官謂順
曰此朝廷之事非我所裁順曰叔父既握國柄殺生由
己自言天之歷數應在我躬何得復有朝廷也義彌忿
憚之轉為安東將軍齊州刺史順自負有才不得居內
每懷鬱悒形于言色遂縱酒歡娛不親政事義解領軍
徵為給事黃門侍郎親友郊迎賀其得入順曰不患不

入正恐入而復出耳俄兼殿中尚書轉侍中初中山王
熙起兵討元乂不果而誅及靈太后反政方得改葬順
侍坐西遊園因奏太后曰臣昨往看中山家葬非唯宗
親哀其冤酷行路士女見其一家七喪皆為潜然莫不
酸泣乂妻時在太后側順指之曰陛下奈何以一妹之
故不伏元乂之罪使天下懷冤太后嘿然不語就德興
反於營州使尚書盧同往討之大敗而返屬侍中穆紹
與順侍坐因論同之罪同先有近宅借紹紹頗欲為言

順勃然曰盧同將終無罪太后曰何得如侍中之言順
曰同有好宅與要勢侍中豈慮罪也紹慙不敢復言靈
太后頗事粧飾數出遊幸順面諍曰禮婦人夫喪自稱
未亡人首去珠玉衣不被綵陛下母臨天下年垂不惑
過甚修飾何以示後世靈太后慙而不出還入宮責順
曰千里相徵豈欲衆中見辱也順曰陛下盛服炫容不
畏天下所笑何恥臣之一言乎初城陽王徽慕順才名
偏相結納而廣陽王淵姦徽妻于氏大為嫌隙及淵自

定州被徵入為吏部尚書兼中領軍順為詔書辭頗優
美微疑順為淵左右由是與徐紇間順於靈太后出順
為護軍將軍太常卿順奉辭于西遊園微紇侍側順指
之謂靈太后曰此人魏之宰嚭魏國不滅終不死亡紇
脅肩而出順遂抗聲叱之曰爾刀筆小人正堪為机案
之吏寧應忝茲執戟虧我彞倫遂振衣而起靈太后嘿
而不言時追論順父顧託之功增任城王彞邑二千戶
又析彞邑五百戶以封順為東阿縣開國公順疾微等

間之遂為蠅賦曰余以仲秋休沐端坐衡門寄想琴書

託情紙翰而蒼蠅小蟲往來牀几疾其變白聊為賦云

遐哉大道廓矣洪氛肇立秋夏爰啟冬春既含育于萬

性又芻狗而不仁隨因緣以授體齊美惡而無分生茲

穢類靡益于人名備羣品聲損衆倫歆脛纖翼紫首蒼

身飛不能迴聲若遠聞黜緇成素變白為黑寡愛蘭芳

偏貪穢食集桓公之屍居平叔之側亂鷄鳴之響晉毀皇

宮之飾習習戶庭營營榛棘反覆往還譬彼讒賊膚受

既通譖潤罔極緝緝幡幡交亂四國於是妖姬進邪士
來聖賢擁忠孝摧周昌拘於牖里天乙囚于夏臺伯奇
為之痛結申生為之蒙災鴟鴞悲其室採葛懼其懷小
弁隕其涕靈均表其哀自古明哲猶如此何況中庸與
凡才若夫天生地養各有所親獸必依地鳥亦憑雲或
來儀以呈祉或自擾而見文或負圖而歸德或銜書以
告真或夭胎而奉味或殘軀以獻珍或主皮而興禮或
牢豢以供神雖死生之異質俱有益于國人非如蒼蠅

之無用唯構亂于蒸民遂屬疾在家杜絕慶弔後除吏部尚書兼右僕射及上省登階向榻見榻甚故問都令史徐忤起忤起曰此榻曾經先王坐順即哽塞涕泗交流久而不能言遂令換之時三公曹令史朱暉素事錄尚書高陽王雍雍欲以為廷尉評頻請託順順不為用雍遂下命用之順投之于地雍聞之大怒昧爽坐都廳召尚書及丞郎畢集欲待順至于衆挫之順曰高方至雍攘袂撫几而言曰身天子之子天子之弟天子之叔

天子之相四海之內親尊莫二元順何人以身成命投
棄於地順鬚鬢俱張仰面看屋憤氣奔涌長歎而不言
久之搖一白羽扇徐而謂雍曰高祖遷宅中土叛定九
流官方清濁軌儀萬古而朱暉小人身為省吏何合為
廷尉清官殿下既先皇同氣宜遵成旨自有恒規而復
踰之也雍曰身為丞相錄尚書如何不得用一人為官
順曰庖人雖不治庖尸祝不得越樽俎而代之未聞有
別旨令殿下參選事順又厲聲曰殿下必如是順當依

事奏聞雍遂笑而言曰豈可以朱暉小人便相忿恨遂起呼順入室與之極飲順之亢毅不撓皆此類也後除征南將軍右光祿大夫轉兼左僕射爾朱榮之奉莊帝召百官悉至河陰素聞順數諫諍惜其亮直謂朱瑞曰可語元僕射但在省不須來順不達其旨聞害衣冠遂便出走為陵戶鮮于康奴所害家徒四壁無物斂屍止有書數千卷而已門下通事令史王才達裂裳覆之莊帝還宮遣黃門侍郎山偉巡喻京邑偉臨順喪悲慟無

已既還莊帝怪而問曰黃門何為聲散偉以狀對莊帝
勅侍中元祉曰宗室喪亡非一不可周贍元僕射清苦
之節死乃益彰特贈絹百匹餘不得例贈驃騎大將軍
尚書令司徒公定州刺史謚曰文烈順撰帝錄二十卷
詩賦表頌數十篇今多亡失

長子朗時年十七枕戈潛伏積年乃手刃康奴以首祭
于順墓然後詣闕請罪朝廷嘉而不問朗涉歷書記為
司徒屬天平中為奴所害贈都督瀛冀二州諸軍事關

字將軍尚書右僕射冀州刺史

順弟淑弟悲並早卒

悲弟紀字子綱永熙中給事黃門侍郎隨出帝沒于關中

澄弟嵩字道岳高祖時自中大夫遷員外常侍轉步兵校尉大司馬安定王休薨未及卒哭嵩便遊田高祖聞而大怒詔曰嵩不能克己復禮企心典憲大司馬薨殂甫爾便以鷹鷂自娛有如父之痛無猶子之情捐心棄

禮何其太速便可免官後從平沔北累有戰功除左中
郎將兼武衛將軍高祖南伐蕭寶卷將陳顯達率衆拒
戰嵩身備三仗免胄直前將士從之顯達奔潰斬獲萬
計嵩于爾日勇冠三軍高祖大悅而言曰任城康王大
有福德文武頓出其門以功賜爵高平縣侯資帛二千
五百疋初高祖之發洛也馮皇后以罪幽于宮內既平
顯達回次穀唐原高祖疾甚將賜后死曰使人不易可
得顧謂任城王澄曰任城必不負我嵩亦當不負任城

可使嵩也于是引嵩入內親詔遣之世宗即位以武衛

將軍兼侍中出為平南將軍荊州刺史嵩表曰蕭寶卷

骨肉相殘忠良先戮臣下囂然莫不離背君臣攜貳干

戈日尋流聞寶卷雍州刺史蕭衍兄懿于建業阻兵與

寶卷相持荆郢二州刺史並是寶卷之弟必有圖衍之

志臣若遣書相聞迎其本謀冀獲同心并力除衍一行

之後彼必旋師赴救丹陽當不能復經營疆陲全固襄

沔臣之軍威已得臨據則沔南之地可一舉而收緣漢

曜兵示以威德思歸有道者則引而納之受疑告危者則援而接之總兵竚銳觀釁伺隙若其零落之形已彰怠懈之勢已著便可順流摧鋒長驅席卷詔曰所陳嘉謀深是良計如當機形可進任將軍裁之既而蕭衍尋克建業乃止除平北將軍恒州刺史轉平東將軍徐州刺史又轉安南將軍揚州刺史蕭衍湘州刺史楊公則率衆二萬屯軍洛口姜慶真領卒五千據于首陂又遣其左軍將軍騫小眼軍主何天祚張俊興等率衆七千

攻圍陸城嵩乃遣統軍封邁王會等步騎八千討之邁
達陸城賊皆夜遁追擊破之斬獲數千公則慶真退還
馬頭衍徐州刺史昌義之屯據高皇遣三軍潛寇陰陵
以淮水淺竭不通船艦屯于馬頭衍將田道龍何景先
等領卒三千已至衡山規寇陸城寇並充逼嵩遣兼統
軍李叔仁等援合肥小岷楊石頻戰破之衍征虜將軍
趙革屯于黃口嵩遣軍司趙熾等往討之先遣統軍安
伯醜潛師夜渡伏兵下蔡革率卒四千逆來拒戰伯醜

與下蔡戍主王虎等前後夾擊大敗之俘斬溺死四千
餘人統軍李叔仁等夜襲硤石之賊又破之衍將姜慶
真專據肥汭冠軍將軍曹天寶屯于鷄口軍主尹明世
屯東硤石嵩遣別將羊引次于淮西去賊營十里司馬
趙熾率兵一萬為表裏聲勢衆軍既會分擊賊之四壘
四壘之賊戰敗奔走斬獲數千溺死萬數統軍牛敬賓
攻硤石明世宵遁慶真合餘燼浮淮下下蔡戍主王略
截流擊之俘斬大半于是威名大振後為蒼頭李太伯

等同謀害嵩并妻穆氏及子世賢世宗為嵩舉哀于東堂賻絹一千匹贈車騎將軍領軍謚曰剛侯

第二子世儁頗有幹用而無行業襲爵除給事中東宮舍人伯父澄表求轉階授之於是除員外散騎常侍肅宗時追論嵩勲封世儁衛縣開國男食邑二百戶遷冠軍將軍宗正少卿又為散騎常侍安南將軍武衛將軍河南尹尋除鎮東將軍青州刺史轉征東將軍加散騎常侍邢杲之亂圍逼州城世儁憑城拒守遂得保全孝

莊時除衛將軍吏部尚書。朱兆寇京師，詔世儁以本官為都督，防守河橋及兆至河，世儁初無拒守意，便隔岸遙拜。時論疾之前，廢帝世為驃騎將軍，仍加尚書。尤為爾朱世隆所昵。出帝初加儀同三司，改封武陽縣開國子，食邑五百戶。世儁居選曹，不能厲心，多所受納。為中尉，彈糾坐免官。尋復本職。孝靜初，加侍中、尚書、右僕射。遷尚書令。世儁輕薄，好去就，詔送晉陽。興和中薨，贈侍中都督，冀定瀛殷四州諸軍事，驃騎大將軍，太傅，定。

州刺史尚書令開國公如故謚曰躁戾

子景遠襲散騎侍郎

世賢弟世哲武定中吏部郎

嵩弟瞻字道周高祖時自

關

大夫稍遷宗正少卿龍驤

將軍光州刺史散騎常侍左將軍遷平東將軍兗州刺史頗愛書史而貪暴好殺澄深恥忿之絕其往來有四子

長子遠尚書郎

史臣曰顯祖之將禪讓可謂國之大節康王毅然庭諍
德音孔昭一言興邦其斯之謂歟文宣貞固俊遠鬱為
宗傑身因累朝寧濟夷險既社稷是任其梁棟之望也
順蹇諤倣儻有汲黯之風不用於時橫招非命惜矣嵩
有行陳之氣雋則裂冠之徒歟

魏書卷十九中

魏書卷十九中考證

任城王雲傳拜都督中外諸軍事中都坐大官○北史
作中都大官無坐字

諸寺靈塔○石林燕語漢以來九卿官府皆名曰寺鴻
臚其一也本以待四裔賓客明帝時攝摩騰竺法蘭
自西域以白馬負經至舍于鴻臚寺既死尸不壞因
留寺中後遂以為浮圖之居即雒中白馬寺也僧居
稱寺本此

魏書卷十九中考證

謹案卷十九上第十頁前四行為辨宗錄刊本宗
下多室字據北史及經籍志改

卷十九中第十一頁後二行可為我力疾向北刊
本為訛謂據毛本改

第十八頁前五行于時高肇刊本時訛是據毛本
改

第二十七頁前一行卑室而禹功盛刊本卑訛畢
今改

第三十頁前二行討元义不果而誅刊本果訛畢

據諸本改





覆校官編修臣方燁

校對官編修臣朱攸

謄錄貢生臣潘沛然

欽定四庫全書薈要

史部

魏書卷十九下

詳校官內閣侍讀臣孫球



欽定四庫全書薈要卷四千四百三十七

史部

魏書卷十九下

齊

魏

收

撰

魏書列傳第七下

景穆十二王

南安王 城陽王 章武王 樂陵王 安定王

南安王楨皇興二年封加征南大將軍中都大官尋遷
內都大官高祖即位除涼州鎮都大將尋以綏撫有能

加都督西戎諸軍事征西大將軍領護西域校尉儀同
三司涼州刺史徵為內都大官出為使持節侍中本將
軍開府長安鎮都大將雍州刺史楨性忠謹事母以孝
聞賜帛千匹以褒之徵赴講武高祖引見於皇信堂戒
之曰翁孝行著於私庭令問彰於邦國每欽忠懿思一
言展故因講武遠徵赴闕仰戀仁慈情在未已但長安
鎮年饑民儉里須綏撫不容久留翁今還州其勤隱恤
無令境內有饑餒之民翁既國之懿親終無貧賤之慮

所宜慎者略有三事一者恃親驕矜違禮僭度二者傲慢貪奢不恤政事三者飲酒遊逸不擇交友三者不去患禍將生但能慎此足以全身遠害光國榮家終始之德成矣而楨不能遵奉後乃聚斂肆情文明太后高祖並臨皇信堂引見王公太后令曰汝陰王天賜南安王楨不順法度黷貨聚斂依犯論坐將至不測卿等為當存親以毀令為欲滅親以明法羣臣咸以二王託體先皇宜蒙矜恕太后不答高祖乃詔曰南安王楨以懿戚

之貴作鎮關右不能潔已奉公助宣皇度方肆貪欲殖
貨私庭放縱姦囚壅絕訴訟貨遺諸使邀求虛稱二三
之狀皆犯刑書昔魏武翦髮以齊衆叔向戮弟以明法
克已忍親以率天下夫豈不懷有為而然耳今者所犯
事重疇日循古推刑實在難恕皇太后天慈寬篤恩矜
國屬每一尋惟高宗孔懷之近發言哽塞悲慟于懷且
以南安王孝養之名聞於內外特一原恕削除封爵以
庶人歸第禁錮終身後高祖南伐楨從至洛及議遷都

首從大計高祖甚悅楨母劉太妃薨高祖親幸臨慰及
葬贈布帛綵五百段又以楨議定遷都復封南安王食
邑一千戶出為鎮北大將軍相州刺史高祖餞楨於華
林都亭詔曰從祖南安旣之蕃任將曠違千里豫懷惻
戀然今者之集雖曰分歧實為曲宴並可賦詩申意射
者可以觀德不能賦詩者可聽射也當使武士彎弓文
人下筆高祖送楨於階下流涕而別太和二十年五月
至鄴入治日暴風大雨凍死者十數人楨又以旱祈雨

于羣神鄴城有石虎廟人奉祀之楨告虎神像云三日
不雨當加鞭罰請雨不驗遂鞭像一百是月疽發背薨
諡曰惠贈帛一千疋及葬又賜帛千疋遣黃門郎監護
喪事及恒州刺史穆泰謀反楨知而不告雖薨猶追奪
爵封國除有五子

子英字虎兒性識聰敏博聞彊記便弓馬解吹笛微曉
醫術高祖時為平北將軍武川鎮都大將假魏公未幾
遷都督梁益寧三州諸軍事安南將軍領護西戎校尉

仇池鎮都大將梁州刺史高祖南伐為梁漢別道都將
後大駕臨鍾離詔英率衆備寇境上英以大駕親動勢
傾東南漢中有可乘之會表求進討高祖許之師次沮
水蕭鸞將蕭懿遣將尹紹祖梁季羣等領衆二萬徼山
立柵分為數處居高視下隔水為營英乃謀曰彼帥賤
民慢莫能相服衆而無上罔知適從若選精卒并攻一
營彼不相救我克必矣若克一軍四營自拔於是簡兵
三面騰上果不相救既破一處四營俱潰生擒梁季羣

斬三千餘級俘七百人鸞白馬戍將其夜逃潰乘勝長驅將逼南鄭漢川之民以為神也相率歸附梁州民李天幹等詣英降待以國士之禮天幹等家在南鄭之西請師迎接英遣迎之蕭懿聞而遣將姜脩率衆追襲逮夜交戰頗有殺傷脩後屢敗復更請軍懿遣衆赴之迎者告急英率騎一千倍道赴救未至賊已退還英恐其入城別遣統軍元拔以隨其後英徼其前合擊之盡俘其衆懿續遣軍英不虞賊至且衆力已疲軍少人懼咸

欲奔走英乃緩騎徐行神色自若登高望賊東西指麾
狀似處分然後整列而前賊謂有伏兵俄然賊退乘勢
追殄遂圍南鄭禁止三軍一無所犯遠近皆供租運先
是英未至也蕭懿遣軍主范潔領三千餘人伐獠潔聞
大軍圍城欲還救援英遣統軍李平敵李鐵騎等收合
巴西晉壽土人以斷其路潔以死決戰遂敗平敵之軍
英候其稍近以奇兵掩之盡皆擒獲攻圍九十餘日戰
無不克被勅班師英於是先遣老弱身勒精卒留後遣

使與懿告別懿以為詐也英還一日猶閉門不開二日之後懿乃遣將追英英親自殿後與士卒下馬交戰賊衆莫敢逼之四日四夜然後賊退全軍而還會山氏並反斷英歸路英勒衆奮擊且戰且行為流矢所中軍人莫有知者以功遷安南大將軍賜爵廣武伯在仇池六載甚有威惠之稱父憂解任高祖討漢陽起英為左衛將軍加前將軍尋遷大宗正又轉尚書仍本將軍鎮荊州蕭寶卷將陳顯達等寇荊州英連戰失利車駕至南

陽免英官爵世宗即位行徐州還復尚書廣武伯蕭寶
卷遣將軍陳伯之寇淮南司徒彭城王勰鎮壽春以英
為鎮南將軍率衆討之英未至賊已引退勰還詔英行
揚州後英還京師上表曰臣聞取亂侮亡有國之常道
陳師鞠旅因機而致發竊以區區寶卷罔顧天常憑恃
山河敢抗中國今妖逆數亡驕縱日甚威侮五行怠棄
三正淫刑以逞虐害無辜其雍州刺史蕭衍東伐秣陵
埽土興兵順流而下唯有孤城更無重衛此則皇天授

我之日曠載一逢之秋事易走丸理同拾芥此而不乘
將欲何待臣乞躬率步騎三萬直指沔陰據襄陽之城
斷黑水之路昏虐君臣自相魚肉我居上流威震遐邇
長驅南出進拔江陵其路既近不盈五百則三楚之地
一朝可收岷蜀之道自成斷絕又命揚徐二州聲言俱
舉緣江焚毀靡使所遺建業窮蹙魚遊釜內士治之師
再興孫皓之縛重至齊文軌而大同混天地而為一伏
惟陛下暫闢旒纁少垂聽覽獨決聖心無取疑議此期

脫爽并吞未日事寢不報英又奏曰臣聞乘虛討弱事
在速舉因危攻昧敏捷可期今寶卷亂常骨肉相賊蕃
戍鼎立莫知所歸義陽孤絕密邇天境外靡糧援之期
內無兵儲之固此乃臨焚之鳥不可去薪授首之寇何
容緩斧若此行有果則江右之地斯為經略之基如脫
否也非直後舉難圖亦或居要生疾今豫州刺史司馬
悅已戒嚴垂邁而東豫州刺史田益宗方擬守三關請
遣軍司為之節度世宗遣直寢羊靈引為軍司以軍功

拜吏部尚書以前後軍功進爵常山侯英奏謹案學令
諸州郡學生三年一校所通經數因正使列之然後遣
使就郡練考臣伏惟聖明崇道顯成均之風蘊義光膠
序之美是以太學之館久置於下國四門之教方構於
京廛計習訓淹年聽受累紀然雋造之流應問於魏闕
不革之輩宜返於齊民使就郡練考覈其寔殿頃以皇
都遷構江揚未一故鄉校之訓弗遑正試致使薰蕕之
質均誨學庭蘭蕭之體等教文肆今外宰京官銓考向

訖求遣四門博士明通五經者道別校練依令黜陟詔
曰學業墮廢為日已久非一使能勸比當別勅尋詔英
使持節假鎮南將軍都督征義陽諸軍事率衆南討蕭
衍司州刺史蔡道恭聞英將至遣其驍騎將軍楊由率
城外居民三千餘家於城西南十里賢首山即嶺為二
柵作表裏之勢英勒諸軍圍賢首壘焚其柵門楊由乃
驅水牛從營而出繼之以兵軍人避牛師遂退下尋分
兵圍守其夜柵民任馬駒斬由以降三軍館穀降民安

堵蕭衍遣其平西將軍曹景宗後將軍王僧炳等率步騎三萬來救義陽僧炳統衆二萬據鑿岷景宗率一萬繼後英遣冠軍將軍元逞揚烈將軍曹文敬進據樊城以抗之英部勒將士犄角討之大破僧炳軍俘斬四千餘人英又於士雅山結壘與景宗相抗分遣諸統伏於四山示之以弱衍將馬仙琕率衆萬餘來掩英營英命諸軍偽北誘之既至平地統軍傅永等三軍擊之賊便奔退進擊潰之斬首二千三百級斬賊羽林監軍鄧終

年仙琚又率一萬餘人重來決戰英勒諸將隨便分擊
又破之復斬賊將陳秀之統軍王買奴別破東嶺之陣
斬首五百道恭憂死驍騎將軍行州事蔡靈恩復憑窮
城短兵日接景宗仙琚知城將拔盡銳決戰一日三交
皆大敗而返靈恩勢窘遂降三關戍聞之亦棄城而走
詔曰知賊城已下復克三關展威闢境聲略宣振公私
稱泰良以欣然將軍淵規內斷忠謨外舉受律揚旌克
申廟算雖方叔之制蠻荆召虎之掃淮浦匹茲蔑如也

新州初附宜廣經略想善加檢督必令周固有所委付
然後凱旋耳初高祖之平漢陽英有戰功許復其封反
為顯達所敗遂寢是役也世宗大悅乃復之改封中山
王食邑一千戶遣大使鴻臚少卿睦延吉持節就拜英
送蔡靈恩及衍尚書郎蔡僧勰前軍將軍義陽太守馮
道要遊擊將軍鮑懷慎天門太守王承伯平北府司馬
宗象平北府諮議參軍伏榮給事中寧朔將軍蔡道基
中兵參軍龐脩等數十人詔曰會平江南此等便可放

歸也英既還世宗引見深嘉勞之後增封一千戶蕭衍遣將軍寇肥梁詔英使持節加散騎常侍征南將軍都督揚徐二道諸軍事率衆十萬討之所在皆以便宜從事詔英曰賊勢滋甚圍逼肥梁邊將後規以至於此故有斯舉必期勝捷而出軍淹滯肥梁已陷聞之惋憊實乖本圖今衆軍雲集十有五萬進取之方其算安在克殄之期復當遠近竟以幾日可至賊所必勝之規何者為先故遣步兵校尉領中書舍人王雲指取機要英表

陳事機乃擊破陰陵斬行將二十五人及虜首五千餘
級又頻破賊軍於梁城斬其支將四十二人殺獲及溺
死者將五萬行中軍大將軍臨川王蕭宏尚書左僕射
柳惔等大將五人沿淮南走凡收米三十萬石詔勞英
曰知大摧鯨寇威振南海江浦無塵三楚卷壘聲被荒
隅同軌斯始公私慶慰良副朕懷便當乘威藉響長驅
吳會翦拉遺燼截彼東南也英追至於馬頭行馬頭戍
主委城遁走遂圍鍾離詔曰師行已久士馬疲瘠賊城

險固卒難攻屠冬春之交稍非勝便十萬之衆日費無
貲方圖後舉不待今事且可密裝徐嚴為振旅之意整
疆完土開示威略左右蠻楚素應逃亡或竄山湖或難
制掠若凶渠黠黨有須翦除者便可撲掃以清疆界如
其彊狡憑阻未易致力者亦不煩肆兵凱旋遲近不復
委曲英表曰臣奉辭伐罪志殄逋寇想敵量攻期至二
月將末三月之初理在必克但自此月一日以來霖雨
連併可謂天違人願然王者行師舉動不易不可以少

致睽淹便生異議臣亦諦思若入三月已後天晴地燥
憑陵是常如其連雨仍接不得進攻者臣已更高邵陽
之橋防其汎突意外洪長慮其破橋臣亦部分造船復
於鍾離城隨水狹處營造浮橋至三月中旬橋必克成
晴則攻騰雨則圍守水陸二圖以得為限實願朝廷特
開遠略少復賜寬假以日月無使為山之功中途而廢
詔曰大軍野次已成勞久攻守之方理可豫見比頻得
啓制勝不過暮春及省後表復期孟夏之末彼土蒸濘

無宜久淹勢雖必取乃將軍之深計兵久力殆亦朝廷之所憂故遣主書曹道往觀軍勢使還王具聞及道還英猶表云可克四月水盛破橋英及諸將狼狽奔走士衆沒者十有五六英至揚州遣使送節及衣冠貂蟬章綬詔以付典有司奏英經算失圖案劾處死詔恕死爲民後京兆王愉反英復王封邑一千戶除使持節假征東將軍都督冀州諸軍事英未發而冀州已平時郢州治中督榮祖潛引蕭衍軍以義陽應之三關之戍並據

城降行郢州刺史婁悅嬰城自守懸瓠城民白早生等
殺豫州刺史司馬悅據城南叛行將齊苟仁率衆守懸
瓠悅子尚華陽公主并為所劫詔英使持節都督南征
諸軍事假征南將軍出自汝南世宗引英謂之曰婁悅
綏御失和銓衡闇於簡授故使郢民引寇關戍外奔義
陽孤窘有倒懸之切王國之召虎威名宿震故屈王親
總元戎掃清氛穢昔衛霍以匈奴之故居無寧歲今南
疆不靖王不得以屢勞為辭也英對曰臣才非韓白識

閻孫吳徒以宗室之長頻荷推轂之寄規略淺短失律
喪師宜章子反之戮以謝天下陛下慈深念屢愛等鍾
牛使臣得同荀伯再生明世誓追孟氏以報復為期關
郢微寇何足平殄滅賊方略已在臣目中願陛下勿勞
聖慮也世宗曰截彼東南再清隨楚所望於將軍鍾離
一青豈足以損大德今王董彼三軍朕無憂矣世宗以
邢巒頻破早生詔英南赴義陽英以衆少累表請軍世
宗弗許而英輒與邢巒分兵共攻懸鉤克之乃引軍而

進初苟仁之據懸瓠衍寧朔將軍張道凝等率衆據楚城聞英將至棄城南走英追擊斬道凝及衍虎賁中郎曹苦生盡俘其衆既次義陽將取三關英策之曰三關相須如左右手若克一關兩關不待攻而定攻難不如攻易東關易攻宜須先取即黃石公所謂戰如風發攻如河決英恐其并力於東乃使長史李華率五統向西關分其兵勢身督諸軍向東關先是馬仙琕使雲騎將軍馬廣率衆拒屯於長薄軍主胡文超別屯松峴英至

長薄馬廣夜遁入於武陽英進師攻之間行遣其冠軍將軍彭覓生驃騎將軍徐超秀援武陽英乃緩軍曰縱之使入此城吾先曾觀其形勢易攻耳吾取之如拾遺也諸將未之信覓生等既入武陽英促圍攻之六日而廣等降於是進擊黃峴行太子左衛率李元履棄城奔竄又討西關行司州刺史馬仙琕亦即退走果如英策凡擒其大將六人支將二十人卒七千米四十萬石軍資稱是還朝除尚書僕射永平三年英薨給東園祕器

朝服一具帛七百匹贈司徒公諡曰獻武王英五子

攸字玄興東宮洗馬早卒贈散騎侍郎

攸弟熙字真興好學俊爽有文才聲著於世然輕躁浮動英深慮非保家之主常欲廢之立第四子略為世子宗議不聽略又固請乃止起家祕書郎延昌二年襲封累遷兼將作大匠拜太常少卿給事黃門侍郎尋轉光祿勳時領軍于忠執政熙忠之壻也故歲中驟遷尋除平西將軍東秦州刺史進號安西將軍祕書監尋以本

將軍授相州刺史熙以七月入治其日大風寒雨凍死者二十餘人驢馬數十匹熙聞其祖父前事心惡之又
有蛆生其庭初熙兄弟並為清河王懌所昵及劉騰元
又隔絕二宮矯詔殺懌熙乃起兵上表曰臣聞安危無
常時有休否臣早屬休明晚逢多難自皇基綿茂九葉
承光高祖世宗徽明相襲皇太后聖敬自天德同馬鄧
至尊神叡纂御神鑒燭遠四海晏如八表歸化而領軍
將軍元又寵藉外親叨榮左右豺狼為心飽便反噬遂

使二宮阻隔溫清闕禮又太傅清河王橫被屠害致使
忠臣烈士喪氣闕庭親賢宗戚憤恨內外妄指鹿馬孰
能踰之王董權逼方此非譬臣仰瞻雲闕泣血而生以
細草不除將為爛漫况又悖逆如此孰可忍之臣忝藉
枝萼思盡力命碎首屠肝甘之若齋今輒起義兵實甲
八萬大徒既進文武爭先與并州刺史城陽王徽恒州
刺史廣陽王淵徐州刺史齊王蕭寶夤等同以今月十
四日俱發庶仰憑祖宗之靈俯罄義夫之命掃翦兇醜

更清京邑臣親總三軍星邁赴難置兵溫城伏聽天旨
王公宰輔或世著忠烈或宿佩恩顧如能同力翦除元
乂使太后至尊忻然奉對者臣即解甲散兵赴謝朝闕
臣雖才乖昔人位居蕃屏寧容坐觀姦醜虛受榮祿哉
熙兵起甫十日為其長史柳元章別駕游荆魏郡太守
李孝怡率諸城人鼓譟而入殺熙左右四十餘人執熙
置之高樓并其子弟又遣尚書左丞盧同斬之於鄴街
傳首京師始熙妃于氏知熙必敗不從其謀自初哭泣

不絕至於熙死熙臨刑為五言詩示其寮吏曰義實動
君子主辱死忠臣何以明是節將解七尺身與知友別
曰平生方寸心殷勤屬知己從今一銷化悲傷無極已
熙既蕃王之貴加有文學好奇愛異交結偉俊風氣甚
高名美當世先達後進多造其門始熙之鎮鄴也知友
才學之士袁鵬李琰李神雋王誦兄弟裴敬憲等咸餞
於河梁賦詩告別及熙將死復與知故書曰吾與弟並
蒙皇太后知遇見兄據大州弟則入侍殷勤言色恩同慈

母今皇太后見廢北宮太傅清河王橫受屠酷主上幼年獨在前殿君親如此無以自安故率兵民建大義於天下但智力淺短旋見囚執上慙朝廷下愧相知本以名義干心不得不爾流腸碎首復何言哉昔李斯憶上蔡黃犬陸機想華亭鶴唳豈不以恍惚無際一去不還者乎今欲對秋月臨春風藉芳草蔭花樹廣召名勝賦詩洛濱其可得乎凡百君子各敬爾宜為國為身善勗名節立功立事為身而已吾何言哉時人憐之又熙於

任城王澄薨前夢有人告之曰任城當死死後二百日
外君亦不免若其不信試看任城家熙夢中顧瞻任城
第舍四面牆崩無遺堵焉熙惡之覺而以告所親及熙
之死也果如所夢兄弟三人每從英征伐在軍貪暴或
因迎降遂北至有斬殺無辜多增首級以為功狀又于
忠之誣郭祚裴植也忠意未決害之由熙勸獎遂至極
法世以為冤及熙之禍議者以為有報應焉靈太后反
政贈使持節都督冀定瀛相幽五州諸軍事大將軍太

尉公冀州刺史增本封一千戶謚曰文莊王

長子景獻次仲獻次叔獻並與熙同被害後贈景獻中
軍將軍青州刺史葬以王禮仲獻左將軍兗州刺史叔
獻右將軍齊州刺史

叔獻弟叔仁以年幼獲全與母于氏徙朔州孝昌初靈
太后詔叔仁歸京師還其財宅襲先爵除征虜將軍通
直散騎常侍孝莊初遇害於河陰贈衛大將軍儀同三
司并州刺史

子琳襲齊受禪爵例降

熙弟誘字惠興自員外郎稍遷通直郎太子中庶子征虜將軍衛尉少卿出為右將軍南秦州刺史又斬之於岐州妻子得不坐追贈車騎大將軍雍州刺史後贈儀同三司追封都昌縣開國伯食邑八百戶謚曰恭子始伯襲給事中齊受禪爵例降

誘弟略字儁興才氣劣於熙而有和遂之譽自員外郎稍遷羽林監通直散騎常侍冠軍將軍給事黃門侍郎

清河王懌死後又黜略為懷朔鎮副將未及赴任會熙
起兵與略書來去尋值熙敗略遂潛行自託舊識河內
司馬始賓始賓便為荻筏夜與略俱渡盟津詣上黨屯
留縣栗法光法光素敦信義忻而納之略舊識刁雙時
為西河太守略復歸之停止經年雙乃令從子昌送略
潛遁江左蕭衍甚禮敬之封略為中山王邑一千戶宣
城太守俄而徐州刺史元法僧據城南叛州內士庶皆
為法僧擁逼行乃以略為大都督令詣彭城接誘初附

略至屯於河南為安樂王鑒所破略唯數十騎入城行
尋遣其豫章王綜鎮徐州徵略與法僧同還略雖在江
南自以家禍晨夜哭泣身若居喪又惡法僧為人與法
僧言未嘗一笑衍復除略衡州刺史未行會綜以城歸
國綜長史江革司馬祖暉將士五千人悉見擒虜肅宗
勅有司悉遣革等還南因以徵略衍乃備禮遣之略之
將還也行為置酒餞別賜金銀百斤衍之百官悉送別
江上遣其右衛徐確率百餘人送至京師肅宗詔光祿

大夫刁雙境首勞問又勅徐州賜絹布各一千匹除略
侍中義陽王食邑一千戶還達石人驛亭詔宗室親黨
內外百官先相識者聽迎之近郊賜帛三千匹宅一區
粟五千石奴婢三十人其司馬始賓除給事中領直後
栗法光本縣令刁昌東平太守刁雙西兗州刺史其略
所至一餐一宿之處無不霑賞尋改封東平王又拜車
騎大將軍左光祿大夫儀同三司領左衛將軍侍中如
故又本官領國子祭酒遷大將軍尚書令靈太后甚寵

任之其見委信殆與元徽相埒於時天下多事軍國萬
端略守常自保無他裨益唯唯具臣而已爾朱榮略之
姑夫略素所輕忽略又黨於鄭儼徐紇榮兼銜之榮入
洛也見害於河陰贈以本官加太保司空徐州刺史諡
曰文貞

子景式襲武定中北廣平太守齊受禪爵例降

略弟纂字紹興頗有將略為司徒祭酒聞熙舉兵因逃
奔於鄴至即見擒與熙俱死追封北平縣公贈安北將

軍恒州刺史改封高唐縣開國侯食邑八百戶

子子獻襲卒於涇州司馬

熙異母弟義興出後叔父並洛肅宗初除員外散騎侍

郎及熙之遇害也義興以別後故得不坐稍遷輔國將

軍通直散騎常侍孝莊初於河陰遇害贈中軍將軍瀛

州刺史後贈散騎常侍征東將軍餘如故義興妻趙郡

李氏李頗有婦工為爾朱榮妻所親昵永安中追封義

興燕郡王邑五百戶尋改封鉅鹿王又改封武邑王

子述襲天平中通直郎齊受禪爵例降

英弟怡起家步兵校尉轉城門校尉遷鄆善鎮將所在
貪暴為有司所糾逃竄得免延昌中卒莊帝初以爾朱
榮婦兄超贈驃騎大將軍太尉公雍州刺史扶風王

長子肅起家員外散騎侍郎轉直寢莊帝初封肅魯郡
王邑千戶除散騎常侍出為後將軍廣州刺史後除衛
將軍肆州刺史其弟曄僭立拜肅侍中太師錄尚書事
尋改除使持節都督青膠光齊南青五州諸軍事驃騎

大將軍東南道大行臺青州刺史不行永熙二年薨贈
使持節侍中都督并恒二州諸軍事本將軍司徒公并
州刺史

子道與襲除前將軍齊受禪爵例降

曄字華興小字盆子性輕躁有膂力起家祕書郎稍遷
通直散騎常侍莊帝初封長廣王邑一千戶出為太原
太守行并州事爾朱榮之死也世隆等奔還并州與爾
朱兆會於建興乃推曄為主大赦所部號年建明尋為

世隆等所廢前廢帝立封暉為東海王邑萬戶出帝初坐事賜死於第無子爵除

城陽王長壽皇興二年封拜征西大將軍外都大官出為沃野鎮都大將性聰惠善撫接在鎮甚有威名延興五年薨諡康王

長子多侯早卒

次子鸞字宣明始繼叔章武敬王及兄卒還襲父爵身長八尺脣帶十圍以武藝著稱頻為北都大將高祖時

拜外都大官又出為持節都督河西諸軍事征西大將軍領護西戎校尉涼州鎮都大將改鎮立州以鸞為涼州刺史姑臧鎮都大將餘如故後朝于京師會車駕南討領鎮軍將軍定都洛陽高祖幸鄴詔鸞留守及開建五等食邑一千戶除使持節征南大將軍都督豫荆郢三州河內山陽東郡諸軍事與安南將軍盧淵李佐攻赭陽不克敗退而還時高祖幸瑕丘鸞請罪行宮高祖引見鸞等責之曰卿等總率戎徒義應奮節而進不能

夷拔賊城退不能殄茲小寇虧損王威罪應大辟朕革
變之始事從寬貸今捨卿等死罪城陽降為定襄縣王
削戶五百古者軍行必載廟社之主所以示其威惠各
有攸歸今徵卿等敗軍之罪於社主之前以彰厥咎後
以留守之功還復本封增邑二百戶除冠軍將軍河內
太守轉并州刺史世宗初除平東將軍青州刺史後轉
安北將軍定州刺史鸞愛樂佛道脩持五戒不飲酒食
肉積歲長齋繕起佛寺勸率百姓共為土木之勞公私

費擾頗為民患世宗聞而詔曰驚親唯宗懿作牧大州
民物殷繁綏寧所屬宜克已厲誠崇清樹惠而乃驟相
徵發專為煩擾編戶嗷嗷家懷嗟怨北州土廣姦亂是
由隼法尋愆應加肅黜以驚戚屬情有未忍可遣使者
以義督責奪祿一周微示威罰也正始二年薨時年三
十八贈帛六百匹詔中書舍人王雲宣旨臨弔贈鎮北
將軍冀州刺史謚懷王

子徽字顯順粗涉書史頗有吏才世宗時襲封除遊擊

將軍出為河內太守在郡清整有民譽徵拜長兼散騎
常侍肅宗時除右將軍涼州刺史徽以徑途阻遠固請
不行除散騎常侍其年除後將軍并州刺史先是州界
夏霜禾稼不熟民庶逃散安業者少徽輒開倉賑之文
武咸共諫止徽曰昔汲長孺郡守耳尚輒開倉救民災
敝况我皇家親近受委大藩豈可拘法而不救民困也
先給後表肅宗嘉之加安北將軍後拜安西將軍秦州
刺史詔書旦至夕發徽以將之秦部請詣闕恭授仍表

啓固陳請不之職改授輔國將軍加度支尚書進號鎮
軍將軍于時戎馬在郊王師屢敗徽以軍旅之費上國
封絹二千匹粟一萬石以助軍用肅宗不納又以本官
兼吏部尚書加侍中征東將軍遷衛將軍右光祿大夫
拜尚書左僕射轉車騎將軍儀同三司固辭不拜聽解
侍中然後受詔尋除尚書令加開府西道行臺不行時
靈太后專制朝綱頽褻徽既居寵任無所匡弼與鄭儼
之徒更相阿黨外似柔謹內多猜忌睚眦之忿必思報

復識者嫉之又不能防閑其妻于氏遂與廣陽王淵姦
通及淵受任軍府每有表啓論徽罪過雖涉誣毀頗亦
實焉莊帝踐阼拜司州牧尋除司徒仍領牧元顥入洛
徽從莊帝北巡及車駕還宮以與謀之功除侍中大司
馬太尉公加羽葆鼓吹增邑通前二萬戶餘官如故徽
表辭官封前後屢上又啓云河上之功將士之力求回
所封加諸勲義徽為莊帝親侍內懼榮寵故有此辭以
防外議莊帝識其意聽其辭封不許讓官徽後妻莊帝

舅女侍中李或帝之姊婿徽性佞媚善自取容挾內外之意宗室親戚莫與比焉遂與或等勸帝圖榮莊帝亦先有意榮死世隆等屯據不解除徽太保仍大司馬宗師錄尚書事總統內外徽本意謂榮死後枝葉自應散亡及爾朱宗族聚結謀難徽筭略無出憂怖而已性多嫉妬不欲人居其前每入參謀議獨與帝決朝臣有上軍國籌策者並勸帝不納乃云小賊何慮不除又恡惜財用自家及國於是有所賞錫咸出薄少或多而中減

與而復追徒有糜費恩不感物莊帝雅自約狹尤亦徽
所贊成太府少卿李苗徽司徒時司馬也徽待之頗厚
苗每致忠言徽自得志多不採納苗謂人曰城陽本自
蜂目而豺聲復將露也及爾朱兆之入禁衛奔散莊帝
步出雲龍門徽乘馬奔度帝頻呼之徽不顧而去遂走
山南至故吏寇彌宅彌外雖容納內不自安乃怖徽云
官捕將至令其避他所使人於路邀害送屍於爾朱兆
出帝初贈使持節侍中太師大司馬錄尚書事司州牧

諡曰文獻

子延襲爵武定末官至太子中庶子齊受禪爵例降

徽兄顯魏給事中司徒掾卒贈輔國將軍東豫州刺史
徽次兄顯恭字懷忠揚州別駕以軍功封平陽縣開國
子邑三百戶孝莊初除北中郎將遷左將軍東徐州刺
史入為安東將軍大司農卿尋除中軍將軍荊州刺史
莊帝既殺爾朱榮乃除顯恭使持節都督晉建南汾三
州諸軍事鎮西將軍兼尚書左僕射西北道行臺晉州

刺史爾朱兆入洛後死於晉陽出帝初贈衛大將軍并
州刺史重贈車騎大將軍儀同三司

子彥昭襲武定中漁陽太守齊受禪爵例降

顯恭弟旭字顯和莊帝時封襄城郡王邑一千戶武定
末位至大司馬齊受禪爵例降

章武王太洛皇興二年薨追贈征北大將軍章武郡王
諡曰敬無子高祖初以南安惠王第二子彬為後

彬字豹兒襲爵勇健有武用出為使持節都督東秦幽

夏三州諸軍事鎮西大將軍西戎校尉統萬鎮都大將
朔州刺史以貪恠削封是時吐京胡反詔彬持節假平
北將軍行汾州事率并肆之衆往討之胡平仍除征虜
將軍汾州刺史胡民去居等六百餘人保險謀反扇動
徒類彬請兵二萬有司奏許之高祖大怒曰何有動兵
馬理也可隨宜肅治若不能權方靜帖必須大衆者則
先斬刺史然後發兵彬奉詔大懼而率州兵身先將士
討胡平之太和二十三年卒賜錢十萬絹二百匹贈以

本官加散騎常侍彬有五子

長子融字永興儀貌壯麗衣冠甚偉性通率有豪氣高祖時拜祕書郎世宗初復先爵除驍騎將軍蕭衍遣將寇逼淮陽梁城陷沒詔融假節征虜將軍別將南討大摧賊衆還復梁城于時揚州刺史元嵩為奴所害勅融行揚州事尋除假節征虜將軍并州刺史及世宗崩無司空營陪景陵拜宗正卿以本官行瀛州事遇疾不行未幾除散騎常侍平東將軍青州刺史還為祕書監遷

中護軍進號撫軍將軍領河南尹加征東將軍性尤貪
殘恣情聚斂為中尉糾彈削除官爵汾夏山胡叛逆連
結正平平陽詔復融前封征東將軍持節都督以討之
融寡於經略為胡所敗久之加散騎常侍衛將軍左光
祿大夫後賊帥鮮于脩禮寇暴瀛定二州長孫稚等討
之失利除融車騎將軍為前驅左軍都督與廣陽王淵
等共討脩禮師渡交津葛榮殺脩禮而自立轉營至白
牛邏輕騎擊融融苦戰終日更無外援遂大奔敗於陳

見殺肅宗為舉哀於東堂賜東園祕器朝服一具綵二千八百段贈侍中都督雍華岐三州諸軍事本將軍司空雍州刺史尋以融死王事進贈司徒加前後部鼓吹諡曰莊武

子景哲襲武定中開府儀同三司齊受禪爵例降景哲弟朗即後廢帝語在帝紀

子黃頭襲封安定王改封安平王齊受禪爵例降

融弟凝字定興起家恒州征虜錄事參軍累遷護軍長

史凝姑爾朱榮妻莊帝初封東安王食邑五百戶除持節安東將軍兗州刺史轉濟州刺史仍本將軍永熙二年薨贈持節都督滄瀛冀三州諸軍事驃騎大將軍冀州刺史

子彥友襲武定中光祿大夫齊受禪爵例降

凝弟湛字鎮興起家祕書郎轉尚書左司郎中遷廷尉少卿莊帝初遇害河陰贈征東將軍青州刺史追封漁陽王食邑五百戶

子俊襲齊受禪爵例降

湛弟晏字俊興卒於祕書丞贈平東將軍祕書監豫州刺史

樂陵王胡兒和平四年薨追封樂陵王贈征北大將軍諡曰康無子顯祖詔胡兒兄汝陰王天賜之第二子永全後之襲封後改名思譽高祖初蠕蠕犯塞以思譽為鎮北大將軍北征大都將後除使持節本將軍領護匈奴校尉都督中軍都將出為使持節鎮東大將軍和龍

鎮都大將營州刺史加領護東夷校尉轉為鎮北將軍
行鎮北大將軍高祖引見百官於光極堂謂思譽曰恒
代路懸舊都意重故屈叔父遠臨此任不可不敬慎所
臨以副朕望及穆泰陰謀不軌思譽知而不告怒死削
封為庶人太和末還復其王封正始四年薨贈光州刺
史諡曰密王

子景略字世彥世宗時襲封拜驍騎將軍除持節冠軍
將軍幽州刺史熙平元年薨贈本將軍豫州刺史賜帛

四百匹諡曰惠王

子霸字休邦襲武定中鉅鹿太守齊受禪爵例降

景略弟慶略散騎侍郎

子子政通直散騎常侍

慶略弟洪略恒農太守中軍將軍行東雍州刺史

洪略弟子業平原太守

定安王休皇興二年封拜征南大將軍外都大官休少而聰慧治斷有稱高祖初庫莫奚寇邊以休為使持節

侍中都督諸軍事征東大將軍領護東夷校尉儀同三司和龍鎮將休撫防有方賊乃款附入為中都大官蠕蠕犯塞出為使持節征北大將軍撫冥鎮大將休身先將士擊虜退之入為內都大官遷太傅及開建五等食邑二千戶車駕南伐領大司馬高祖親行諸軍遇休以三盜人狗於六軍將斬之有詔赦之休執曰陛下將遠清衡霍故親御六師跋涉野次軍行始爾已有姦竊如其不斬何以息盜請必行刑以肅姦慝詔曰大司馬執

憲誠應如是但因緣會朕聞王者之體亦時有非常之澤雖違軍法可特原之休乃奉詔高祖謂司徒馮誕曰大司馬嚴而秉法諸軍不可不慎於是六軍肅然定都洛邑休從駕幸鄴命休率從駕文武迎家于平城高祖親餞休於漳水之北十八年休寢疾高祖幸其第流涕問疾中使醫藥相望於路薨賜帛三千匹自薨至殯車駕三臨高祖至其門改服謁衰素弁加經皇太子百官皆從行弔禮及將葬又贈布帛二千匹謚曰靖王詔假

黃鉞加羽葆鼓吹虎賁班劍六十三人悉準三老尉元
之儀高祖親送出郊慟哭而返諸王恩禮莫比焉世宗
世配饗廟庭

長子安幼年早卒

次子燮除下大夫世宗初襲拜太中大夫除征虜將軍
華州刺史燮表曰謹惟州治李潤堡雖是少梁舊地晉
芮錫壤然胡夷內附遂為戎落城非舊邑先代之名爰
自國初護羌小戍及改鎮立郡依岳立州因籍倉府未

刊名實竊見馮翊古城羌魏兩民之交許洛水陸之際
先漢之左輔皇魏之右翼形勝名都實惟西蕃輿府今
州之所在豈唯非舊至乃居岡飲澗井谷穢雜升降劬
勞往還數里譟譟明昏有虧禮教未若馮翊面華渭包
原澤井淺池平樵牧饒廣採材華陰陸運七十伐木龍
門順流而下陪削舊雉功省力易人各為已不以為勞
昔宋民無井穿井而忻得人況合城無水得水而不家
慶竊聞前政刺史非是無意或值兵舉或遇年災緣此

契闊稽延至此去歲已熟秋方大登四境晏安京師無
事丁不十錢之費人無八旬之勤損輕益重乞垂昭鑒
遂詔曰一勞永逸便可聽移後除征虜將軍幽州刺史
延昌四年薨贈本將軍朔州刺史

子超字化生肅宗初襲時以胡國珍封安定公改封北
平王拜城門校尉通直散騎常侍東中郎將尋除光祿
大夫領將作大匠後復本封爾朱榮之入洛超避難洛
南遇寇見害莊帝初贈車騎大將軍儀同三司岐州刺

史

子孝景襲武定中通直郎齊受禪爵例降

變弟願平清狂無行高祖末拜員外郎世宗初遷給事中悖惡日甚殺人劫盜公私咸患世宗以其戚近未忍致之於法乃免官禁之別館館名愁思堂冀其克念世宗崩願平乃得出靈太后臨朝以其暴亂不悛詔曰願平志行輕疎每乖憲典可還於別館依前禁錮久之解禁還家付師嚴加誨獎後拜通直散騎常侍前將軍坐

裸其妻王氏於其男女之前又彊姦妻妹於妻母之側
御史中丞侯剛案以不道處死絞刑會赦免黜為員外
常侍孝昌中卒

子緒幽州安西府功曹參軍莊帝初直閣將軍尋為持
節兼武衛將軍關右慰勞十二州大使遂沒吐谷渾

子長春員外散騎侍郎武定初封南郡王邑五百戶齊
受禪爵例降

願平弟永平征虜將軍南州刺史為城民華延明所害

太昌初追贈使持節侍中都督定瀛幽三州諸軍事衛將軍定州刺史

永平弟珍平司州治中

子叔遵員外散騎常侍

珍平弟貴平羽林監轉射聲校尉莊帝初除散騎常侍宗正少卿封東萊王邑百戶除平北將軍南相州刺史莊帝既殺爾朱榮加武衛將軍兼侍中為河北山東慰勞大使至定州東北為幽州大都督侯淵所執送於晉

陽後還洛前廢帝時以本官行青州事屬土民崔祖螭作逆賊徒甚盛圍逼東陽一百餘日貴平率城民固守又令將士開門交戰大軍救至遂擒祖螭等斬之還除車騎將軍加散騎常侍遷左衛將軍宗師又遷車騎大將軍左光祿大夫儀同三司貴平人才險薄為出帝所信出為青州刺史又加驃騎大將軍開府儀同三司為幽州大都督侯淵所害

史臣曰南安原始要終善不掩惡英將帥之用有聲於

時熙略兄弟早播民譽或才疎志大或器狹任廣咸不能就其功名俱至非命惜也康王不永鸞起家聲徽飾智矯情外諂內忌永安之禍誰任其責宛其死也固其宜哉章武樂陵蓋不足數靜王聰斷威重見稱太和美矣

魏書卷十九下


魏書卷十九下考證

南安王楨傳景宗率一萬繼後○萬監本誤驍今改正

魏書卷十九下考證

謹案第十四頁前八行東園秘器刊本園訛園今

改





覆校官編修臣方燁

校對官編修臣朱攸

謄錄監生臣魏綿曾